

弘

簡

錄

弘簡錄卷一百十六

明刑部員外郎仁和弘齋邵經邦學

皇清翰林院侍講學士四世孫遠平校閱

功臣 宋三之三

王全斌

曾孫

王仁贍

崔彥進

康延澤

兄延

曹光實

從子

高彥暉

王繼濤

曹翰

楊信

弟嗣

党進

李漢瓊

劉遇

李懷忠

米信

田重進

劉廷翰

崔翰

王全斌太原人自幼穎敏其父事唐莊宗爲岢嵐軍使私畜勇

士百人疑有異志名之懼不敢行全斌時年十二請父納已爲

質果獲全宥因隸帳下莊宗入洛累遷內職同光之難近臣宿

將皆遁全斌獨與符彥卿等居中拒戰明宗卽位補禁軍列校

晉初以從侯益破張從賓功遷護聖指揮使周廣順初改護聖爲龍捷以爲右廂都指揮使討慕容彥超爲行營馬步都校從向拱平秦鳳領恩州團練遷泗州防禦從世宗平淮南復瓦橋關收相州留後宋初與慕容延釗由東路會大軍進討李筠以功拜安國軍節度使奉詔完葺兩山堡砦不踰時而就又與郭進等率兵入太原境至樂平俘數千人以歸乾德二年王師伐蜀拜全斌忠武軍節度西川行營前軍都部署率禁步騎兵二萬詣州兵萬人由鳳州路進名示川陝地圖授以方略因奏臣等仗天威遵廟謨刻日可定上曰卿能如此吾復何憂十二月率兵拔乾渠渡萬仞燕子二砦遂下興州刺史監思綰退保西縣敗蜀軍七千獲糧四十餘萬進拔石圖魚關白水二十餘砦先鋒史延德進軍三泉敗蜀軍數萬擒招討韓保正副使李進

獲糧三十餘萬旣而崔彥進康延澤等逐蜀軍過三泉遂至嘉陵俘獲甚衆蜀人斷閣道軍不能前初議取羅州路延澤彥進謂其路險軍難並進不如分兵沿閣道與大軍會於深渡全斌然之命二將督治數日而成進擊金山砦破小漫天砦與全斌會蜀人依江列陣以待彥進遣張萬友等奪其橋會梓蜀人退保大漫天砦詰朝彥進延澤萬友分三道進擊蜀人悉其精銳來逆又大破之乘勝拔其砦蜀將王審超監軍趙崇涅遁去復與三泉監軍劉延祚樞密王昭遠澤州節度使趙彥相三戰三敗追至利州北昭遠遁渡桔栢江焚其梁退守劔門遂克利州得糧八十萬自利州趨劔門次益光時京城大雪上設氍毹于講武殿衣紫貂裘帽視事謂左右曰我被服若此體尚覺寒念西征將士衝犯霜雪何以堪處卽解裘帽遣中黃門馳賜全斌

仍諭諸將曰不能徧及也全斌拜賜感泣會諸將議曰劔門天險宜各陳進取之策侍衛軍頭向翺因降卒牟進言益光江東越大山數重有狹徑名來蘇蜀人於江西置砦對岸有渡自此出劔關南二十里至清強店與大路合於此進兵卽劔門不足恃也全斌卽欲卷甲赴之延澤言來蘇細徑不須主帥親往命一偏將趨之大軍乘勝與諸帥協力夾攻破之必矣全斌納其策命史延德分兵趨來蘇造浮梁蜀人棄砦而遁昭遠聞之亦引兵退陣于漢源坡蜀留偏將使守劔門全斌等擊破之昭遠彥韜皆走遣輕騎獲送闕下遂克劔門殺蜀軍萬餘四年正月師次魏城孟昶遣使奉表來降全斌等入成都旬餘劉廷讓等始自峽路至昶饋遺及犒師並同全斌詔書頒賞亦無差降由是兩軍相嫉帥亦不協會有詔發蜀兵赴闕人給錢十千未行

者加兩月廩食全斌不卽給蜀軍憤怨又列帥各保庇其隨軍使臣不令部送蜀兵但分遣諸州牙校蜀軍至綿州果叛劫屬邑衆至十餘萬自號興國軍有交州刺史全師雄舉族赴闕亂兵獲之師雄嘗爲帥有威惠遂推以爲主全斌遣都監米光緒往招撫之至則盡滅師雄族私其愛女及橐裝師雄怨遂無歸志率衆急攻綿州爲田紹斌劉福所敗遂據彭州自號興蜀大王成都十縣皆起兵應之開建募府署僚屬置節帥二十餘分據灌口導江郫新繁青城等縣彥進萬友同討之反爲所敗賊衆益盛全斌又遣張延翰張煦往擊不利退入成都師雄分兵綿漢斷絕間道緣江置砦聲言欲攻成都自是邛蜀眉雅東川果遂渝合資簡昌普嘉戎榮陵十七州並從賊郵傳不通全斌等甚懼時城中蜀兵尚餘二萬慮其應賊誘至夾城中盡殺之

會劉廷讓曹彬破賊衆於新繁俘萬餘人師雄退保郫縣全斌
仁贍又攻破之生擒僞刺史陵州指揮元裕磔于都市師雄走
保灌口砦餘黨散保州縣有虎捷指揮呂翰爲全斌所不禮因
殺知嘉州武懷節通判劉沂戰懼都監劉漢卿虎捷都校馮紹
與師雄黨劉澤合衆至五萬逐普州刺史劉楚信又果州指揮
宋德威殺知州王永昌通判劉渙都監鄭光弼逐牙校王可璫
率州民亦爲亂未幾師雄病死其黨復推謝行本爲主羅七君
爲佐國令公與宋德威唐閼鼐據銅山康延澤破之翰爲仁贍
敗于嘉州走雅州又敗之走黎州爲下所殺棄屍水中後丁德
裕等分兵招輯賊衆始息會有訴全斌破蜀日奪民子女玉帛
不法等事遂與諸將同時召還上因初立大功不下之獄但令
中書問狀具伏詔以全斌等披堅執銳全蜀畏威尋馳詔以巾

恩用示哀而敦撫其孟昶宗族官吏將卒士民以下悉令安存無或驚擾而乃違戾約束侵侮憲章專殺降卒豪奪婦女廣納貨財歛萬民之怨嗟致羣盜之充斥以致再勞調發方獲平寧其隱沒金銀犀玉錢帛擅開豐德庫致失錢無算今皆引服宜準律處分特從寬貸因建隨州爲崇義軍金州爲昭化軍責授全斌彥進皆觀察留後將校有受到人財物者並卽還主開寶末郊恩召入侍祠面諭朕以江左未平慮諸將不遵紀律故抑卿數年爲朕立法今已克金陵還卿節鉞授武寧軍節度使仍賜以銀器錢帛數月卒年六十九贈中書令生平輕財重士不求聲譽寬厚容衆軍旅樂爲之用惜其不能善後遂致功名不終黜居典郡十餘年怡然自得識者稱之子審鈞由崇儀使領富州刺史爲廣州兵馬鈐轄轉永興軍駐泊都監因擊賊而死

審銳供奉官閤門祇候天禧二年錄其孫永昌爲三班奉職
曾孫凱字勝之從祖審鈞徙家京兆自幼狀貌奇偉貲蓄豐裕
好結賓客京尹寇準追論曩時取蜀有勞審鈞又死忠義當錄
其孤拜爲三班奉職歷左右班殿直監鳳翔監屋稅益州市買
院轉慶州合水鎮兵馬監押監在京草場擺閤門祇候定邢趙
都巡檢使元昊反徙麟州都監嘗出雙烽橋染枝谷遇夏人破
之又破龐青黃羅部再戰于伺候烽前後斬獲馬牛橐駝器械
以數千計夏人圍麟州乘城拒鬪晝夜三十一日始解去遷西
頭供奉官代還爲內殿崇班麟州路緣邊都巡檢使與同巡檢
張岳護糧道于青眉浪寇猝大至夾擊之斬首百餘級又入兔
毛川遇賊三萬凱兵祇六千陷於圍中流矢中面鬪不解斬首
并自蹂踐死者以千數內侍宋永誠哭于軍中効罷之遷南作

坊副使改并代州鈐轄管勾麟府軍馬事夏人二萬寇青塞堡
凱出鞋邪谷轉戰四十里至杜貼川大敗之得所掠馬牛以還
經略明鎬上其功領資州刺史會平甘陵盜拜澤州刺史知邠
州歷神龍衛捧日天武四廂都指揮使澤州團練綿州防禦環
慶并代定州路副都總管至侍衛親軍步軍副都指揮使涇州
觀察使又徙秦鳳路入辭諭以吮氏木征交易阻絕頗有入寇
之萌宜安靜以處之至則與主帥撫以恩信遂復常貢名拜武
勝軍節度觀察留後卒年六十六贈彰武軍節度使諡莊恪生
平篤于故舊治軍有紀律善撫士卒平居與均飲食臨陣毅然
不少假借故士卒畏服戰無不力前後與敵遇未嘗挫衄子臧
臧子詵字晉卿工詩畫尚主官至留後

王仁贍唐州方城人少側儉不事生產委質刺史劉詞詞懇永

典節度署仁贍爲牙校詞卒遣表薦其材可大用太祖亦素知其名請於世宗以款帳下受禪後授仁贍武德使出知秦州改左飛龍使遷右領軍衛將軍充樞密承旨高繼冲歸命以爲荆南巡檢使繼冲入朝命知軍府遷左千牛衛大將軍內客省使召赴闕擢樞密副使加左衛大將軍討蜀命爲鳳州路行營前軍都監時諸將貪財納賂軍政廢弛每使蜀來者太祖令悉陳全斌等不法事盡得其狀及歸帝而詰仁贍因歷詆諸將冀欲自解帝曰納故蜀將李廷珪妓女開豐德庫取金寶豈他人耶遂不能對責授右衛大將軍後帝幸洛命判留守三司兼知開封府事俄權宣徽北院事太平興國初加檢校太保親征太原充大內部署久乃論功加檢校太傅五年親征契丹復爲大內都部署尋判三司總轄裏外巡檢司公事密奏近臣戚里並遣

人秦隴問市竹木聯巨筏至京師所過關渡矯制免算既至厚
結有司悉官市之倍收其直帝怒以三司副使范旻戶部判官
杜載開封判官呂端屬吏案驗具伏三人皆謫司戶程德立以
下十餘人各謫降罰奉有差仁瞻掌計司殆十年恣吏爲姦諸
場院官隱沒官錢以千萬計怙恩寵無敢發者會陳恕等因議
本司事不協朝叅日恕獨出班狀奏其事帝詰之仁瞻屈伏帝
怒甚再責唐州防禦使而恕等悉獎擢仁瞻既失權勢因怏怏
成疾卒年六十六子昭雍崇儀副使

崔彥進大名入純質有膽略善騎射漢乾祐中隸周祖帳下廣
順初補衛士顯德初爲控鶴指揮使從征淮南以功遷散員都
虞候平瓦橋關敗東西班指揮領果州團練使宋初征李筠爲
先鋒部署有功遷常州防禦使平李重進敗虎捷右廂待衛步

軍都指揮領武信軍節度使伐蜀爲鳳州路行營前軍副都部
署還坐縱部掠玉帛子女及諸不法事責授昭化軍節度觀察
留後太祖郊祀西洛來朝復彰信軍節度使太平興國二年移
鎮河陽征太原分命攻城與鄆州防禦尹勳攻其東督戰有勞
上嘉之征幽州又與供奉官江守鈞攻城西北瑛帥與閣門薛
繼興祇候李守斌領兵屯關南論太原功加檢校太尉五年車
駕北巡以爲關南都部署敗契丹于唐興口雍熙三年北伐爲
幽州道行營馬步軍水陸副都部署坐違曹彬節制別道回軍
爲敵所敗貶右武衛上將軍俄復保靜軍節度使端拱元年被
病卒年六十七贈侍中平生頗立戰功好聚財貨所至無善政
沒後諸子爭財太宗不欲辱其父召親決之子懷遵內殿崇班
懷清崇儀副使孫上賢娶鎮王女崇安縣主從湜娶岐王女永

壽縣主爲西京左藏庫副使後坐事除名

康延澤晉護國軍節度兼侍中福之子以蔭補供奉官周廣順二年永興李洪信入覲遣往巡檢遷內染院副使宋平湖湘命齎書幣先往撫高繼冲且察其情僞及還盡得其機事因前導大軍入境遂下荆峽以勞授正使征蜀爲鳳州路馬軍都監飛降以百騎先入成都安撫軍民盡封府庫而還就命爲成都府都監勸全斌等毋盡殺降卒請簡老幼疾病七千人釋之餘以兵衛還賊若來劫卽殺之未晚時不能用俄出兵敗賊黨劉澤王可瓌追北至合州又破謝行本擒羅七君事平優詔嘉獎就命爲東川七州招安巡檢使全斌等得罪延澤亦坐貶唐州教練使開寶中起爲供奉官遷左藏庫副使坐與諸姪爭家財失官居西洛卒

兄延沼幼隸後唐明宗帳下仕晉爲尚食使改

散指揮使都虞候興聖軍都指揮隨澤二州刺史周廣順中爲侍衛馬步軍都軍頭領信州刺史征劉崇率兵攻遼州轉龍捷右廂都校眞拜蔡齊鄭楚四州防禦使晉潞二州兵馬鈐轄宋初征李重進以爲前馬軍都指揮使建隆四年改懷州防禦使征河東又爲先鋒都監時以宿將熟練邊事詔領兵屯潞州會疾歸郡卒年五十八

曹光實雅州百丈人父疇爲蜀靜南軍使控扼邛崃以捍諸蠻光實少武勇有膽氣輕財好施不事細行意豁如也疇卒嗣職遷永平軍管內捕盜遊奕使蜀平後盜賊羣起蠻人張忠樂乘勢攻劫以宿憾夜焚其居光實負母擲戈突圍出賊殺其族三百餘口發冢壞棺慘不可言光實訴于全斌誓雪讐憤圖獻雅州地形要害兼陳用兵攻取之策全斌壯其志令率兵先導官

軍從之。遂克其城。獲忠樂而甘心焉。署義軍都指揮使。殘寇猶據沈黎。光實以所部盡平之。遂令權黎雅二州兼都巡檢使。安輯蠻族。乾德六年。因入貢。見太祖。喜曰。此蜀中俊傑也。升殿。勞問擢爲黎州刺史。改唐州。及平交廣。羣盜未息。拜嶺南諸州都巡檢使。既至。捕逐羣盜。海隅以寧。太平興國二年。就遷本州團練使。征河東。以知威勝軍事。令調軍食。光實願提一旅奮銳先登。帝曰。資糧事重。亦足宜力。河東平。命爲汾遼石沁等州都巡檢使。改汝州。團練使北征。與潘美分道出鴈門。爲前鋒。遇敵迎擊敗之。斬首數千級。優詔嘉獎。李繼捧入朝。以光實爲銀夏綏麟府豐宥都巡檢使。繼遷逃入蕃落。爲邊患。光實乘間掩襲。至地斤澤。俘斬甚衆。破其族帳。獲繼遷母妻及牛羊萬計。繼遷僅免。使人僞請降。光實信之。且欲專其功。不與人謀。及期。繼遷先

伏兵令十數人近城來迎光實從數百騎往赴之至葭蘆川遇害年五十五帝聞驚悼賜賻加等官其子克讓右贊善大夫克恭殿直淳化二年又錄克已爲奉職後至內殿承制克廣至閤門祇候從子克明字堯卿始生遭亂父光遠遇害姆抱匿葦蒲中得免旣長喜兵法善騎射光實奇之補衙內都虞候葭蘆川之難克明時護輜重在後懼軍亂秘不發喪陽令人傳光實命還軍銀州潛與僕張貴入敵中獲光實尸以還葬京師由是顯名俄以母老歸鄉李順反聞其名且將家子欲脅以官克明攜母遁山谷中賊陷雅州克明乃募衆數萬迎王師復名山火井夾門等九縣分兵嘉眉邛三州立七砦以邀賊復雅州斬六千餘人賊將何承祿等走雲南蜀平擢西頭供奉官黎州兵馬監押餘寇未息以權邛州駐泊巡檢明年峽路潰卒鄧紹等復

起攻雅克明又平之還軍于邛遇賊王珂戰于延貢鎮引弓三發三斃入朝改內殿崇班爲溫台等七州都巡檢使景德中改供備庫副使知邕州召左右江蠻洞三十六酋長諭以恩信是歲承天節相率來集悉慰撫出衣服遺之咸泣而去獨如洪峒恃險不至令兩江防邊使黃衆盈引兵攻之斬其首領陸木前杲于市宜州軍校陳進反時鬱江暴漲州城圯克明督丁夫伐木爲郭郭多張旗幟設守禦募溪峒兵三千合黃衆盈兵千五百將趨象州至貴州遇賊擊敗之斬四百餘級賊平巡撫曹利用專其功代還真宗問南方事對稱旨賜一子官遷供備庫使江淮兩浙提舉捉賊克明輒出私錢資捕賞故人爲盡力賊有趨勇者釋其縛使還捕黨與前後獲千餘人知江寧張詠以聞賜錢四十萬領平州刺史轉知辰州撫水蠻叛徙宜融桂昭柳

象邑欽廉白十州都巡檢使兼安撫使與中人楊守珍出師時
朝廷意在招附克明至撫水州與知州蒙永貴等約盟而還未
幾知桂州兼管勾溪峒公事始置溪洞司又奏閱廣南兩路土
軍爲忠敢軍教州人爲陶瓦以覆屋激江水入城防禦火災代
還知滁州徙鼎州交趾李公蘊爲寇復爲文思使知邕州遣人
諭以利害公蘊降遷西上閤門使歷知登舒邵三州復徙鼎州
卒

高彥暉漁陽人仕契丹爲瀛州守將世宗北征以城來降遷耀
階二州刺史宋師伐蜀爲歸州路先鋒都指揮使崔彥進遣與
田欽祚共討全師雄之衆至尊江賊據隘路設伏竹箐中官軍
不利彥暉語欽祚曰日暮矣賊勢益張請收兵詰朝與戰欽祚
欲遁應賊曳其後反紿之曰公食厚祿遇賊畏縮何也彥暉亟

麾兵進欽祚潛遁去彥暉獨與部下十餘騎戰皆死之時年七十餘上以老將練習邊事聞其死甚痛惜之與王繼濤並命優恤賜其家粟帛

王繼濤河朔人少給事漢祖左右乾祐初補供奉官歷諸司副使仕周爲右武衛大將軍淮南平授天長軍使顯德五年遷和州刺史宋初歷左驍騎左神武大將軍乾德二年命護徒治安陵隧道伐蜀爲鳳州路塚砦使下興元全斌命權府事孟昶降與供奉官王守訥部送歸闕坐與昶數求宮妓金帛遂留不遣止令守訥送昶俄詔除彭州刺史綿州軍亂率衆來攻與都監李德榮拒之德榮戰死繼濤身被八槍單騎走至成都素與欽祚不善入朝誣以他事驛召面質之道病卒

曹翰大名人少爲郡小吏乾祐初周祖鎮鄴與語奇之以隸世

宗帳下鎮澶淵。署爲牙校。入封留翰在鎮。會周祖寢疾。翰亟馳見。世宗曰。王爲冢嗣。當入侍醫藥。以安天下。望世宗悟。趨入侍。以府事屬翰。卽位。補供奉官。從征高平。叅豫謀畫。尋遷樞密。承旨。護塞決河。遇降卒八百部。送京師。矯詔殺之。世宗不悅。翰曰。賊以困歸。我初非心服。所得淮南器甲。盡在正陽。苟爲所劫。是復生一淮南矣。乃不之罪。從征瓦橋關。會班師。留知雄州。宋初從平澤潞。還改濟州刺史。討蜀。移知均州。兼西南諸州轉運使。至卽鑿石通道。自石門徑趨歸州。由夔萬入。餉運不乏。全師雄復。窺成都。翰率兵會劉光毅等討平之。呂翰據嘉州叛。翰及諸將奪其城。謀知賊約三鼓復來攻。翰預戒知更更緩其籌。向晨猶二鼓。賊衆不集而潰。因破之。劔南遂平。師還。遷蔡州團練使。征太原。爲行營都壕砦使。河決澶州。董役塞之。翰出銀器。

助工沉所乘白馬以祭復決陽武再令護役皆有成績征江南
率兵先赴改行營先鋒進克池州金陵平復率兵攻江州其軍
校胡德牙將朱德明乘城拒命凡五月而陷翰怒屠城無噍類
殺兵八百調巨艦載所略金帛億萬計以歸錄功遷桂州觀察
使判潁州再征太原爲攻城南面都部署而西北尤險固太宗
遣諭翰曰卿智勇無雙西北面非卿不能當也翰乃奉詔築土
山瞰城中數日而就繼元甚恐軍中乏水城西十餘里谷中有
娘子廟往禱之穿渠得水人馬以給從征幽州率所部攻城東
南隅掘土得蟹翰謂蟹者解也且多足彼援將至不可進拔之
象其班師乎已而果驗五年從幸大名拜威塞軍節度使仍判
潁州復命爲幽州行營都部署督役開南河自雄遼莫以通漕
運又議築大堤擇之遣徒數萬伐木漢境分騎五路各授五絕

旗爲斥候起烽燧于境上敵疑不敢近塞得巨木數萬以濟用
訖事而歸在州歲久征歛苛酷上因其有功優容之會汝陰令
孫崇望訴其私市兵器所爲不法詔遣御史滕中正鞠之獄具
當棄市特貸其罪削官流登州雍熙二年復起歷左右千牛二
衛大將軍分司西京召還卒年六十九贈太尉爲人陰狡多智
數每奏事雖數十條皆默識不少差然貪貨賂多殺降卒身沒
未久子孫有丐乞者咸平初賜諡武毅

問曰以暴易暴恆與暴同救此一方可踵遺風明則人非
幽有鬼恫遠及孫枝近殃厥躬

楊信瀛州人初名義顯德中隸太祖麾下爲裨校入宋權內外
馬步軍副都軍頭領賀州刺史歷鐵騎控鶴都指揮使殿前都
虞候漢州防禦使乾德初爲南郊儀仗都部署四年病瘖上幸

其第賜錢二百萬改領靜江軍節度使開寶二年都知杜延進等將爲不軌謀泄夜啓玄武門名信逮捕遲明獲十九人上親訊而誅之六年遷殿前都指揮使改節建武軍居玄武門外太祖常令御龍直於後池習水戰信聞有鼓譟聲遽入見上云非有他也自送其出語左右曰若眞忠臣九年復改義成軍太平興國二年又改鎮寧軍並領殿前都指揮使信雖有瘖疾而質實自將善部分士卒指顧中敝動有紀律故特見信任終始無疑有童奴田玉能揣度其意每上前奏事及與賓客談論或指揮部下必顧玉書掌爲字玉直達其意無所失三年春方病瘡而瘖疾忽愈上聞駭之遽幸其第自言遭遇兩朝恩寵隆厚敘謝感慨涕泗橫集上加慰勉錫賚明日遂卒贈侍中弟嗣贊嗣建隆初薦爲殿直三遷崇儀副使監火山軍雍熙四年就命

知軍事代還吏民借留再任俄遷高陽關戰櫓都監淳化二年
改知保州門無私謁轉運言其治狀優遷威武軍改崇儀使與
曹思進同爲靜戎軍緣邊都巡檢使又改如京使再知保州有
戰功真宗加洛苑使咸平初領獎州刺史三年與敵人戰于廉
良斬首二千級獲戰馬輜重甚衆以功真拜保州刺史召還將
除團練使以與楊延昭同官不欲繫居其上願守舊官上嘉其
讓二人久居北邊俱以善戰聞時稱二楊嗣以武人治郡又兼
領巡徼在郡日少城堞圯壞詔供備副使趙彬代之改深州團
練都巡檢使兼保州鈐轄明年議防秋條陳北面利害推其練
達邊事出爲鎮定高陽關三路後陣鈐轄連改趙具深三州部
署祥符五年復爲天雄軍副都部署六年以左龍武大將軍致
仕卒年八十一錄其子承憲爲侍禁 贊稍知書無異能以兄

故得掌禁旅累資朝著後至牧守

党進朔州馬邑人幼事杜重威愛其淳謹及壯猶令與姬妾雜侍後進貴重威子孫貧困分月俸給之士大夫以爲美談周廣順初以膂力隸軍伍補散指揮使累遷鐵騎都虞候宋初累遷領虔州團練使虎捷右廂都指揮乾德初改睦州防禦使龍捷左廂都虞候至利州觀察留後五年領彰信軍節度兼侍衛步軍都指揮使親征太原命副李繼勳將河東行營前軍師臨晉陽置砦四面命進主東偏未成列太原驍將楊業領突騎來犯進奮身逐業業急入陞中會援兵至繼勳入城獲免上激賞之六年改侍衛馬軍都指揮使領節鎮安軍九年又命將河東行營兵征太原入境敗其軍于城北太祖崩召還太平興國二年出爲忠武軍節度使在鎮歲餘遇疾卒年五十一贈侍中進彤

貌魁岸居常恂恂至擐甲冑毛髮皆豎素不識字已名進常稱曰暉問之曰從吾便耳故識與不識皆稱党太尉故事都虞候已上悉書所掌兵數于挺上如笏記一日上問所掌幾何進舉挺以示曰盡在是上以其朴直益厚之見閭里畜禽獸者輒取而縱之罵曰買肉不供父母反飼禽獸耶太宗親吏臂鷹雛于市進欲放之吏曰此晉王鷹也進乃戒曰汝謹養視小民傳以爲笑子崇義閑廐使崇貴閤門祇候

李漢瓊洛陽人邢州刺史裕曾孫體質魁岸有膂力晉末補西班衛士遷內殿直周顯德中從征淮南先登歷左射指揮使宋初遷鐵騎第二軍都校領饒瀘二州刺史累遷侍衛馬軍都虞候領洮州觀察使征江南命統行營騎軍兼戰權左廂都指揮使自斯春攻岐口砦斬首數千級獲樓船數百艘沿流拔池州

破銅陵取當塗作浮梁于牛渚以濟大軍分圍金陵率所部渡
秦淮取巨艦實葦其中縱火攻拔水砦江南平以功領節振武
軍太平興國二年出爲彰德軍節度使上親征太原命與牛思
進主攻城南偏漢瓊先登中矢傷甚奮力戰上召至輜殿賜良
藥慰勞之時攻城者皆以牛革冒木上蒙之而進謂之洞子上
欲幸其中勞將士漢瓊亟諫而止太原平改鎮州兵馬鈐轄敗
契丹數萬騎語在劉延翰傳論太原功加檢校太尉駕幸大名謁上備
陳邊事稱旨命爲滄州都部署賜戰馬金甲寶劔戎具六年以
病還京賜白金月餘卒年五十五贈中書令爲人性木強使酒
難近然善戰有功無子弟漢賁太平興國初補供奉官嘗監
高陽關平戎軍乘傳徇婺二州捕劇賊程白眉數十人悉殲焉
累遷崇儀使知寧州漢彬至禮賓副使

劉遇滄州清池人少魁梧善射有膂力周祖鎮大名隸帳下性淳謹待士有禮廣順初補控鶴都頭改副指揮使宋初累遷控鶴右廂都指揮瓊州團練使從征太原以功遷虎捷右廂蔚州防禦使開寶六年轉侍衛步軍都虞候領洮州觀察使征江南統步軍戰糧會諸路兵破吳皖口屯兵三萬擒其將朱令贇王暉獲戎器數萬金陵平加領大同軍節度使尋祀西洛命率禁衛以從太平興國二年出鎮彰信軍征太原與史珪攻城北面平之進攻范陽師還坐所部失律責授宿州觀察使從幸大名復保靜軍節度使幽州行營都部署護築保州威武靜戎平塞長城五城八年徙鎮滑州太宗待之甚厚雍熙二年卒年六十六贈侍中

李懷忠范陽人初名懷義太祖掌禁兵隸帳下爲散都頭累遷

殿前都指揮使都虞候領開州刺史乾德中授東西班都指揮
從征晉陽中流矢戰益奮會欲班師懷忠奏賊嬰孤城內無儲
峙外無援兵破在旦夕臣願奮銳爲士卒先上壯之還授散員
指揮富州團練使歷日騎左右廂都指揮使上幸西京愛其形
勢得天下中有留都意懷忠乘間進曰東京有汴渠之漕歲致
江淮米數百萬斛禁衛數十萬仰給於此帑藏重兵皆在根本
安固已久一旦遽欲遷徙臣實不見其利太宗卽位改領奉州
防禦使稍遷侍衛步軍都虞候領大同軍節度使三年改步軍
都指揮使卒贈侍中錄其子紹宗等三人爲供奉官祥符三年
又錄子德鈞爲借職

米信舊名海進本溪族少勇悍善射周祖以隸護聖軍世宗征
高平以功遷龍捷散都頭太祖總禁兵隸麾下給使左右遂委

心焉初署牙校卽位補殿前指揮使遷直長平揚州日有游騎將迎乘輿射之一發而斃遷內殿直指揮使開寶元年改殿前指揮使領彬州刺史太平興國初轉散都頭指揮領高州團練使三年遷洮州觀察使征太原爲行營馬步軍指揮使與田重進分督諸軍并人潛師來犯信擊敗之殺其將裴正移兵攻范陽還論太原功擢保順軍節度使時族屬多在塞外會兄子全白朔州奮身來歸上召見俾乘傳詣代州伺間迎其親屬然竟不能致信慷慨嘆曰吾聞忠孝不兩立方以身殉國安能復顧親戚哉乃北望號慟戒左右勿復言五年命與郭守贊等同護定州屯兵遷駐泊部署改領彰化軍節度使征幽薊爲幽州西北道行營馬步軍都部署副以杜彥圭出雄州敗契丹于新城敵率衆復來戰王師却信獨以麾下龍衛卒三百力戰契丹圍

之數重。矢下如雨。麾下士多死。會暮。信持大刀大呼殺數十人。敵小却。遂以百餘騎突圍出。坐失律當死。詔特原之。賁授右屯衛大將軍。明年復授彰武軍節度使。端拱初。詔置方田以爲邢州兵馬都部署。二年改鎮橫海軍。信不知書。所爲多暴橫。上命何承矩副之。代決州事。及承矩領護屯田。信遂專恣不法。薄軍人宴犒。私市絹稱官物。以免關征。上廉知之。名爲右武衛上將軍。判金吾街仗事。吏卒無罪。輒被捶撻。尋以罪下獄。鞠之。信具伏獄未上。而卒。年六十七。贈橫海軍節度使。子繼豐。內殿崇班。閑門祇候。

田重進。幽州人。形質奇偉。有武力。周顯德中。應募爲卒。隸太祖麾下。陳橋還。遷御馬軍使。積功至洺州刺史。太宗征太原。錄功擢領天德軍節度使。侍衛步軍指揮使。移節靜難軍。河決滑州。韓

房村命總護其役劉吉副之河遂塞北征以爲定州路兵馬都
部署率師傳飛狐城用袁繼忠計伏兵南口擒契丹驍將大鵬
翼及監軍馬贊副將何萬通并渤海軍三十餘人斬首數千級
俘獲以萬計逐北四十里以其縣爲飛狐軍蔚州牙校李存璋
許彥欽殺酋帥蕭瑣埋執監軍耿紹忠率吏民來附會曹彬師
不利命董師駐定州遷駐泊兵馬都部署明年率師入遼境攻
下岐溝關殺守城兵千餘及獲牛馬輜重以還改領彰信軍淳
化三年拜真定尹成德軍節度使未幾移京兆尹永興軍節度
使五年改知延州復還鎮至道三年卒年六十九贈侍中素性
忠朴不事學問始終委遇未嘗或疑太宗居藩愛其忠勇嘗遺
以酒炙不受使者曰此晉王賜也重進曰爲我謝晉王我知有
天子爾其慙直多類此子守信六宅使守吉閣門祇候

劉廷翰浚儀人父紹隱後唐末隸兵籍晉天福中以隊長戍魏
博范延光反力戰而死周世宗鎮澶淵廷翰以膂力隸帳下卽
位補殿前指揮使累從征伐有功至散指揮第一直都知宋初
眞平上黨維揚遷鐵騎都指揮使領廉州刺史太宗遷右廂都
指揮使領本州團練雲州觀察使從征太原爲鎮州駐泊都鈐
轄北伐師還邊備未得其人命與李漢瓊屯眞定是冬果遇契
丹縱兵南侵廷翰先陣于徐河崔彥進率師出黑蘆堤北銜枚
躡敵後崔翰漢瓊兵繼至合擊之大敗其衆於蒲城遂至遂城
俘斬萬計賞太原功領大同軍節度使殿前都虞候八年改節
彰信軍雍熙四年移鎮邢滑端拱中代郭守文爲鎮州駐泊馬
步軍都部署淳化三年改大名尹天雄軍節度使以病還闕上
親臨問賜資卒年七十贈侍中自衛士至上將頗以武勇自任

寬厚容衆長於御下郊恩當追封三代大父以上忘其家諱上
爲撰名親書賜之子贊元宮苑使澄州刺史贊明皇城使勤州
團練使

崔翰字仲文京兆萬年人少有大志風姿偉秀太祖見而奇之
以隸麾下從周世宗征淮南平壽春取關南以功補軍使宋初
遷御馬直副指揮使從平澤潞遷河東降民以資陝西晉人勇
悍多習武藝命翰差擇之又閱試河北鎮兵取其驍果者以分
配天武兩軍還領端州刺史太宗進本州團練使太平興國二
年講武西郊命代楊信爲殿前都指揮使翰分布士伍綿亘二
十里建五色旗號六師進退周旋如一上御臺臨觀大悅賜以
藩邸時金帶從征太原命總侍衛馬步諸軍率先攻城矢中其
頰神色不變上卽軍帳撫問太原平復有事幽薊諸將以爲膏

陽之役師罷餉置賞且未頒豈敢遽議翰獨奏當乘者勢不可
失者時上以爲然定議北伐旣而班師至金臺驛大軍南向而
潰上令翰率衛兵千餘止之翰請單騎往至則諭以師律衆徐
以定不戮一人復命上喜因令知定州得便宜從事緣邊諸軍
並受節制軍市租儲得專調用與諸將收契丹兵數萬投西山
坑谷死者不可勝計賞太原功擢武泰軍節度使初翰奉上命
往撫劉繼元令俘略無得出城秦王廷美麾下目禁出翰呵止
之至是王構於上出爲感德軍節度使至鎮盜賊充斥秀其某
魁戒以禍福衆感悟散歸農畝境內肅然雍熙二年移知滑州
北伐不利上追念徐河之功召爲威武軍行營兵馬都部署歷
鎮定鎮安二軍淳化三年召還以疾卒年六十三贈侍中翰驍
勇有謀所至立功輕財好施旣死家無餘貲酷信釋氏子繼顯

虞部員外郎孫承業內殿承制問門祇候承祐內殿崇班

弘簡錄卷一百十七

明刑部員外郎仁和弘齋邵經邦學

皇清翰林院侍講學士四世孫遠平校閱

功臣 宋三之四

高瓊

子繼宣

范廷召

荆罕儒

姪孫

李繼宣

馬知節

父全義

雷有終

父德懷從子孝先孫簡夫附王均楊懷忠劉紹榮牛冕張適

石普

許均

子懷德

上官正

附宿翰

高瓊家世燕人祖霸父乾五代時李景割據江南潛結契丹歲

遣使命往復霸將契丹命以乾同行至江左爲謀所間霸被殺

居乾濠州尋挈族歸朝給田亳州之蒙城因家焉瓊少勇鷙無

賴犯罪將刑伺守者稍息掣釘而遁事王審琦晉王尹京知其

材勇召置帳下王嘗宴禁中飲甚醉太祖親送至門瓊左手執

勒右手執鐙翊王乘馬太祖顧而壯之賜以控鶴官衣帶及器帛且勗令盡心焉太宗卽位擢御龍直指揮使從征太原命押弓弩兩班合圍攻城及討幽薊留殿後屬車駕倍道還六軍扈從皆不及惟瓊首率所部見于行在帝大悅慰勞之太平興國四年遷天武都指揮使領西州刺史明年改神衛右廂車駕巡大名命與口騎指揮朱守節分任京城內巡檢坐事出爲許州馬步軍都指揮使知州臧丙出郊有龍騎亡命卒數十謀劫其導從以叛瓊親率麾下數十追至榆林村悉擒送州丙上其事召歸授馬步軍都軍頭領薊州刺史樓船戰糧都指揮使部船千艘赴江州又城易州師還歷天武左右廂都指揮使領富州團練使端拱初出爲單州防禦使改貝州部署二年召還特賜茶藥授侍衛步軍都指揮使領歸義軍節度使無何移并州馬

步軍都部署改鎮州至道中就拜保大軍節度使真宗移彰信軍充山陵部署復移并代典軍如故咸平中契丹犯塞其母車帳至狼山上親巡河朔遣楊允恭馳召瓊率所部出土門與石保吉會鎮定既而以代傳潛兵罷還本任轉運使上其政績詔褒之三年代還授殿前都指揮使范延召桑贊臨敵退切言者請罪之上以問瓊對曰違令於法當誅然去歲陛下已釋其罪方屯諸路非時代易臣恐衆心疑懼乃止澶淵之役賴瓊力勸渡河將士踴躍用命明年兵罷料簡士卒諸班直十年者山補軍校退年老者爲本班剩員瓊謂此非激勵之道宿衛豈無勞苦自是八年者皆得敘補時馬軍都校葛霸權步軍司有疾在告命瓊兼領上言臣衰老儻復有犬馬之疾又須一將總此二職臣事先朝時侍衛都虞候以上常至十員職位相亞易於遷

改且使軍伍熟其名望邊藩緩急亦可選用上深然之三年以疾解兵柄授檢校太尉忠武軍節度使卒年七十二贈侍中瓊不識字然能曉達軍政頗亦自任罕與副將叅議善訓諸子繼勲見外戚 繼宣字舜舉幼善騎射工筆札知讀書以恩補西頭供奉官督惠民河漕船兼沿河巡檢捉賊遷閤門祇候邠州兵馬都監曹瑋薦其可用乾興初爲益州都監值元夕張燈知府薛奎戒以備盜繼宣乃籍惡少飲犒之使夜中潛誌盜背刃日皆獲歷礮相邢洛都巡檢使知安肅軍徙保州累遷禮賓使益州路兵馬鈐轄還爲西上閤門使涇原路鈐轄兼安撫使知渭州遷四方館使昭州刺史知雄州移并州元昊聲言侵關脫繼宣請備麟府未幾羌兵果入帥兵營陵井抵天門關是夕大雨及河師半濟黑凌暴合舟不得進乃具牲酒爲文以禱已而

凌解師濟進屯府谷間遣勇士夜亂賊營又募黥配廂軍得一千餘人號清邊軍命偏將王凱主之軍次三松嶺夏人數萬阻之清邊軍奮起斬首千餘級躡籍復不可計築寧遠砦又城五砦相視地脈鑿石出泉擢捧日天武四廂都指揮使恩州團練眉州防禦使卒次子繼忠繼密繼和繼隆繼元

冊曰有宋隆興治內安外聯姻並孕遺德尚在宣仁聖烈光于一代善訓有功可堪追配

范延召棗強人弱冠長七尺餘負膂力父鐸爲里中惡少所害手刃之剖心以祭周廣順初應募世宗立入補衛士力戰高平遷殿前指揮使征淮南戰紫金山流矢中左股宋初從平澤路平揚州轉本班都知征太原爲散都頭都虞候領費州刺史太平興國中平太原征范陽皆有功坐受秦王廷美犒宴出爲唐

州馬步軍都指揮使雍熙三年議北征以廷召爲幽州道前軍
先鋒都指揮使與賊遇固安南破其衆三千斬首千餘級克固
安新城二縣乘勝下涿州復與賊戰中流矢血漬甲縷神色自
若督戰益急詔褒之師還歷日馭左右廂都指揮使領高州團
練使端拱初爲齊州防禦使授捧日天武四廂改登州防禦二
年轉殿前都虞候領涼州觀察使鎮州副都部署大破契丹衆
三萬于徐河斬首數千級淳化中歷并代環慶都部署至道中
出延州討李繼遷時五路並進諸將多失期獨廷召與王超遇
賊于烏白池大小數十戰獲米募軍主吃囉等兵器鎧甲數萬
上嘉之三年遷侍衛馬軍都指揮使領河西軍節度使爲定州
行營都部署咸平二年車駕北巡與契丹戰瀛州西斬首二萬
級逐北至莫州東三十里又斬首萬餘奪回所掠老幼數萬口

契丹遁去師還錄功加檢校太傅益賦邑又改殿前都指揮使
四年正月被疾車駕臨問卒年七十五贈侍中由顯德以來在
軍四十餘年凡親征未嘗不從善騎射嘗出獵有羣鳥飛過一
矢並貫其三觀者駭異子守均至散員都虞候濱州刺史守信
內殿承制閣門祗候守宣內殿崇班守慶更名珪後爲西京作
坊副使淮南江浙荆湖制置發運副使

荆罕儒冀州信都人王屋令基之子少無賴爲羣盜晉天福中
委質趙延壽掌親兵開運末延壽從契丹入汴署爲密州刺史
漢初改山南東道行軍司馬周廣順初爲率府率世宗戰高平
戮不用命者因求驍勇士通事李延傑以名聞命爲招收都指
揮使征太原率步卒三千先入敵境焚其東門擢控鶴弩手大
初直都指揮使從平淮南領光州刺史改秦州兼海陵鹽城兩

監屯田轉泰州團練使賜金帶銀器鞍馬建隆初升鄴州爲防
禦拜爲使俄改晉州兵馬鈐轄罕儒恃勇輕敵嘗率騎深入晉
境并人多閉壁不出擄獲甚衆復領千餘騎抵汾州城下焚其
草市按兵以退夕次京土原劉均遣大將郝貴超領萬餘衆來
襲黎明及之罕儒遣都監閻彥進分兵以禦已錦袍裹甲據胡
牀享士方割羊膾濡以啖聞彥進小却卽上馬麾兵徑犯賊鋒
并人攢戈脊之猶格鬪手殺十數人遂遇害太祖痛惜不已擢
其子守勳西京武德副使黜王繼勳閻彥進斬其部下石進德
等二十九人罕儒輕財好施雖不知書好禮接儒士常欲削平
太原志未終而及於敗人皆惜之 兄延福孫嗣勇悍有力乾
德初應募爲控鶴卒從李繼勳討河東手斬五十餘級敵焚砦
宵遁進薄汾河敵將楊業扼橋路直前奪之殺業兵千計射中

從騎獲旗鼓鎧甲甚衆夜復來薄接戰至旦多所斬馘征太原
與楊信率先陷陣名見補御龍直三遷至天武軍校再征太原
自陳願率一隊先登命主城西洞子車駕巡師見嗣手刃數卒
足貫雙箭中手殲折二齒亟召賜錦袍銀帶從征幽州隸崔翰
斬三十級補龍猛副指揮使契丹侵雄州據龍灣堤嗣謀袁繼
忠率千兵力戰奪路適內侍閤城壘出郭外敵圍之戰十數合
斬騎卒七百餘嗣軍夜相失三鼓突圍壁于莫州城下又領百
人斧敵望樓斬五十級將遁邀擊殺獲甚衆六年從崔彥進搆
契丹于靜戎北砦於唐興口嗣渡河與戰敗之追奔二十餘里
復從袁繼忠田欽祚戍三义口禦李繼遷爲前鋒斬賊千餘追
獲牛羊鎧甲弓矢進至萬井口狐路谷餘賊復戰因列陣格鬪
復奪人馬七百餘欽祚夜還依山爲營嗣又抵賊砦殺百餘人

焚砦而還詔賜錦袍銀帶雍熙三年從田重進譚延美率師擊遼騎引去進至飛狐城北遼將大鵬翼率衆復至重進陣壓東偏嗣出西偏麾短兵薄山崖接戰手斬百餘級降散卒千餘追至河槽餘衆屯土嶺裨將黃明戰不利嗣語曰汝頓兵以爲聲援我當奪此嶺遂力戰追奔五十餘里抵蒼頭而還又領招收卒千人克倉頭小治二砦黃明亦克直谷砦嗣屯焉數日遼復致師重進召嗣合戰走之奪砲具鎧冑敵乘夜以二萬衆圍直谷石門二砦重進憂援師甚寡嗣請移全軍就平川植旗立隊別擇三百餘人豎白旗於道側以張軍勢自以所部五百疾驅往嗣一日七戰遼兵引去師還太宗引見便殿重進具言其勞補本軍都虞候又從李繼隆禦敵於北平砦俘獲甚衆戰婦女嗣繼隆遣步卒二千伏定州古城爲敵所圍命嗣往援之至唐

河橋扼其橋路與伏兵合分爲三隊背水爲陣敵將于越率騎來薄戰數合乃得與繼隆會又大敗之繼隆以聞詔嘉獎遷本軍都指揮使領澄州刺史至道二年加御前忠佐馬步軍頭屯定州遼人入寇副隸范廷召提偏師捍於嘉山廷召徙高陽命以兵二千爲殿過平敵城遇遼衆十餘萬嗣嬖出戰會桑贊泰翰來援卽與并力衝突詰旦至瀛州咸平三年加領本州團練使出爲鄆山路都巡檢使破敵砦於蒲陰俘獲甚衆五年其拜蔡州團練使趙州部署景德初命與劉漢凝田思明率兵至冀州防邊俄赴瀛州會遼人請和遣還歷郛州以翔永興部署車駕幸亳州留爲舊城內都巡檢使祥符七年改號州防禦使邠寧環慶副部署卒嗣自起行間以勞居方面經百五十餘戰子信貴並爲左侍禁貴至內殿崇班

李繼宣初名繼隆河南浚儀人有勇力乾德中年十七補右班殿直命往陝州捕虎殺虎二十餘生致二虎一豹以獻太平興國初掌南作坊使改供奉官出爲邠寧慶三州巡檢五年召還承受定州路奏事奉詔修長城口平塞威武靜戎軍保州城砦常率兵入敵境使老幼千餘牛畜數百又率兵扞契丹于乾寧泥姑海口契丹寇靜戎軍從崔彥進過拒馬河接戰大敗之移貝州監軍北征從先鋒李繼隆至方城力戰大將曹彬繼至遂克固安進壁涿州東與敵鬪乘勝攻克北門日領輕騎渡河覘敵勢又將五千騎援宋信因率勁騎追至新城北大敗之斬其酋賀恩相公已亦中流矢大軍取糧雄州遇契丹新城疾戰至暮中十劍劒及兜鍪明日復戰繼隆爲敵所邀繼宣以所部拔之且戰且行又戰拒馬河追奔至孤山契丹乃引去以功超授

崇儀使代王繼恩爲易州駐泊都監賜錢五十萬白金五百兩
領騎兵五千戍北平押大陣東偏受田重進節度屯長城口敵
至大溝繼宣進蒲城敵至定州奪唐河橋重進召繼宣與田紹
斌赴援紹斌爲敵所敗繼宣獨按部轉鬪入定州敵兵北去將
五千騎躡其後抵拒馬河敵據楊陘徑掩擊之遂焚廬舍而遁
雍熙四年爲高陽關行營都監端拱初契丹騎至瀛鎮繼宣率
步騎萬人入敵境抵勝務焚聚落獲生口契丹引還時易州候
騎不至繼宣於易州至高陽爲望櫓七所舉烽以候警急二年
爲鎮定高陽關三路排陣都監押大陣西偏與李繼隆部芻糧
抵威武還渡徐河敵追襲駐軍與鬪殺獲甚衆又領騎二千敗
契丹於保州西追薄西山有詔褒美淳化三年徙知保州轉莊
宅使築關城浚外濠葺營舍千五百區造船二百艘入雞距泉

以運糧人咸便之數月徙定州行營都監戍深州課軍中勁弩
爲入陣之備五年領高州刺史會契丹泛海劫千乘縣請於海
口置砦以禦之至道三年歷北南作坊使出爲鎮州行營鈐轄
契丹寇定州至懷德橋繼宣率三千騎掩襲至則契丹已壞橋
乃麾兵橫木而渡追奔五十餘里敵焚鎮州中渡常山二橋繼
宣領兵趨之間敵保豐隆山砦卽伐木治常山橋敵懼拔砦遁
走繼宣銳於追襲頗爲傳潛所抑及潛屬吏詔與高聖同主軍
事逐敵越拒馬河復受詔按視緣邊城砦權知威武軍敵騎至
城下屢出兵設伏斬獲甚衆咸平四年拜西上閤門使領康州
刺史爲前陣鈐轄與秦翰楊延昭楊嗣分屯靜戎威武敵至延
昭與嗣輕騎先赴羊山繼宣與翰分左右隊各整所部留壁赤
鹵至則延昭嗣爲敵所乘繼宣卽召留壁之師合勢大戰敵走

上羊山繼宣逐之馬連中矢斃凡三易馬進至牟山谷大捷延昭嗣翰退保威武繼宣獨以所部與敵角薄暮始至詔書稱獎特加檢校官及食邑明年徙定州鈐轄扞契丹于唐河會延昭與嗣禦敵師敗詔繼宣與內殿崇班王汀代之望都之敗敵騎剽郡縣繼宣壁徐河逗遛不出王汀奏其事召還密院問狀降如京副使景德初加如京使鎮州鈐轄契丹乘秋來攻時桑贊病足鄧誠赴定州繼宣獨主鎮州全師屯邢趙及與契丹和命爲高陽關鈐轄進秩東西上閤門使領康州刺史兼知瀛州上以河間事繁慮獄訟有枉命高繼勳代之祥符初徙鎮定兩路召還改鄆州部署加四方館使以疾授西京水南都巡檢使卒年六十四子守忠左侍禁閤門祇候

馬知節字子元幽州薊人父全義歷晉漢周以功遷殿前指揮

使右番都虞候宋初歷內殿直都知控鶴左廂都校領果州團練使從征澤潞揚州力戰有功累改龍捷左廂都校江州防禦使卒年三十八特贈檢校太保大同軍節度使知節幼孤蔭補供奉官年十八監彭州兵以嚴蒞下衆憚如老將又監潭州兵募何承矩以文雅飾吏治因折節讀書雍熙間護兵博州值君子館敗後完城繕甲儲芻粟若寇至者契丹聞其有備至輒引去徙知定遠軍儲峙多陳時議調河南十三州民轉他粟以餉軍適運使樊知古至知節謀曰軍少粟多汰其紅腐尚當得十之六七知古從之果獲粟五十萬斛分給諸屯遂省河南之役寇至部民入保卒有盜民婦首飾者知節立命斬之改知深慶二州遷西京作坊使移梓州王繼恩討李順專權自恣惡其抗直盡收其軍使守彭州付羸卒三百賊衆數萬攻城知節力戰

自晨抵晡士多死乃橫梁潰圍出招援兵鼓譟復入賊遂潰去
太宗聞而壯之授成都府兵馬鈐轄加蜀漢九州都巡檢使會
廣武叛卒劉旰牙兵爲亂逐巡檢韓景祐衆踰二千連下懷
安永康軍知節引三百騎捕之旰走邛州知節乘勝急擊行次
方井鎮與旰遇盡戮其衆咸平初領登州刺史知秦州悉還諸
羌質子羌人感服訖終任不敢犯塞州有銀坑歲久鑛竭課額
弗除三上章請蠲乃允遷西上閤門使知益州兼本路轉運使
自乾德後籍富民歲漕蜀物動踰萬計多坐沉覆破產知節奏
代以三班使臣及三司軍將課其殿最以爲賞罰蜀人稱便徙
知延州兼鄜州駐泊兵馬都總管羌人以兵鬪邊遇上元節遣
命張燈啓闢累夕宴會寇不測引去徙鎮州詔發潼魏等六州
糧輸定武時兵交境上知節曰發糧適資盜耳止令於舟車所

至收之寇無所得遁去車駕在澶淵王超擁兵數萬屯其定以中渡無橋爲辭逗留不進知節移書誚讓且預令度材一夕而橋成超兵始出景德中徙知定州未幾拜東上閤門使樞密都承旨簽書樞密院事是時朝廷方尚符瑞知節獨不謂然嘗言天下雖安不可忘戰自陳年齒未衰尚可驅策如邊方有警願預其行俄進宣徽北院使兼樞密副使時王欽若爲使知節薄其爲人未常少屈每廷議輒面詆之退見王旦詞色猶怒曰幾欲以笏擊殺欽若但恐驚動君相耳祥符七年出爲潁州防禦使知潞州復移天雄軍以疾乞罷除彰德軍留後知貝州卒于相州年六十五贈侍中諡正惠知節本將家子賦性慷慨以武力智謀自許好讀書賓禮儒生所與善厚必一時豪傑論事蹇蹇未嘗有所顧忌聞其風者皆知以爲正直東封後上每行幸

必命爲都部署許以專殺每部分嚴明未嘗輒戮一人子洵美之美孫慶宗慶崇

雷有終字道成同州郃陽人父德驤字善行川廣順進士解褐磁州軍事判官名爲右拾遺判三司賜緋魚顯德中詔均定隨州諸縣民田屋稅稱爲平允宋初拜殿中侍御史改屯田員外判大理寺時趙普爲相官屬與堂吏附會擅增刑名德驤直詣講武殿奏其事辭氣過厲太祖怒令左右曳出黜爲商州司戶參軍知州吳嶼希旨坐以爲文訕上削籍徙靈武其子有鄰擊登聞鼓訴中書不法事罷普出鎮名德驤爲秘書丞判御史臺吏部南曹擢有鄰正字開寶七年同知貢舉太祖崩使吳越告哀還遷戶部職方二員外郎兼御史知雜事充陝西河北兩浙轉運使歷禮戶兵三部郎中度支判官征太原又爲西路轉運

太平興國六年同知京朝官考課俄遷右諫議大夫端拱初拜
戶部侍郎普再相乞歸坐壻衛濯訟有鄰子孝先內亂失教責
授威德軍行軍司馬慙憤成疾卒年七十五 有終幼聰敏以
蔭補漢州司戶叅軍署萊蕪尉知監劉祺以其年少頗易之有
終因發祺姦賊坐流海島代知監事太宗聞其名遣內侍伍守
忠察其治迹還奏有終彊濟之狀詔爲大理寺丞通判解州入
奏鹽池利害改贊善大夫權知軍事遷殿中丞知密州徙淮南
運副賜緋魚王師北征爲蔚州飛狐路隨軍轉運歷鹽鐵判官
戶部度支副使賜金紫出知昇州以少府少監知廣州以衛濯
訟責衡州團練副使外艱起復爲都官員外郎領江淮兩浙荆
湖福建廣南路茶鹽制置使許以便宜裁制還改工部郎中歷
知大名江陵李順之亂命爲峽路隨軍轉運同知兵馬事調發

兵食規畫戎事皆有節制師行至廣安軍壘瀕江三面樹柵會
夜晦賊衆奄至舉炬鼓譟有終安坐櫺髮自如賊圍既合引奇
兵從後擊之賊衆驚擾赴水死者無算就拜右諫議大夫知益
州次簡州佛舍度賊必至初夕問道而出嚴更警備如故賊圍
守數重及壞寺入惟擊柝者在賊愕然俄兼招安使賊平知許
州改給事中知并州真宗加工部侍郎知審刑院將巡大名遣
乘驛先詣澶州督芻糧駕還聞王均之亂即日拜有終瀘州觀
察使知益州兼川峽兩路招安捉賊事至則先令石普與綿漢
都巡檢張恩鈞收復所陷漢州進壁升僊橋賊出攻砦擊走之
均開城僞遁石普上官正率官軍徑入賊閉關發伏布牀柵於
路軍不得出被殺者多諸將皆緣堞而墜民奔逐四出賊分騎
追殺支解族誅以恐衆又脇士民僧道之少壯者爲兵給軍裝

令乘城與賊黨相間有終退保漢州署榜招其衆來者日數百人進攻彌牟砦斬首千餘級賊復分路來攻官軍逆擊大敗之奪其緞蓋金槍等物均單騎走有終遣子孝若馳奏上召見問狀卽補孝若供奉官賊自升僊之敗徹橋塞門官軍進至清遠江爲梁而渡屯於城北門之西依堦爲土山分設鹿角因舊草場造梯衝洞車攻具石普專主之高繼勳張胸孫正辭攻城東上官正李繼昌王阮攻城西楊懷忠馬貴攻城南賊將趙延順中流矢死復瑩其副丁重萬會雨滑城不能上乃爲洞屋以進賊又鑿地道出掩之是月詔以內副都知秦翰爲兩川捉賊招安使翰至軍與有終叶議於城北魚橋門增築土山進克其羊馬城遂設雁翅敵棚覆洞屋以進賊對設敵樓以抗又遣卒焚之自是賊氣銷沮築月城自固有終募死士間道以入焚其望

櫓機石。普穴城爲暗門。募死士麾戈衝之。賊稍却。遂入城。餘賊皆天長觀前。楊懷忠焚之。設礮架文翁坊。高繼勳又焚之。追至大安門。是夕二鼓。均黨二萬餘。南山萬里橋門突圍遁。有終疑有伏。遣人縱火城中。詰朝與翰登門樓。捕牙吏受僞職者。擲投火中。焚死數百人。時謂冤酷均由廣都。略陵榮趨富順。監所過斷橋塞路。焚倉庫而去。懷忠領虎翼軍追之。普繼往有終以全軍爲後援。均至富順入監署飲食。其黨具筏將渡江。趨戎邏懷忠距富順六十里。少憩楊家市。語左右曰。縱賊渡江。後悔無及。當以奇兵取之。臨江列陣奮擊。餘黨散走。有拏舟將渡者。弩射之。溺死甚衆。乃張旗鳴鼓入城。均方在監署。衆多醉窮蹙。遂自縊死。虎翼軍校魯斌斬其首詣懷忠。獲僞法物旌旗甲馬甚衆。禽其黨六千餘人。悉殲焉。旋軍山北門。普衆始至。弩均首馳。

歸成都梟于北市。先是楊懷忠爲供奉官閤門祇候知蜀州。聞變卽調鄉丁會十一路巡檢兵刻期進討。蜀民不從賊者相率抗禦。僭僞謂之清壇。衆懷忠擇清壇之魁七十餘人悉捕巡檢。因率衆入益州。焚城北門。至三井橋。與賊將魯麻胡陣于江濱廟前。力戰自晨至脯。兵稍却。退還所部。懷忠部下多李順舊黨。頗剽劫。故及於敗。乃移文嘉眉七州調軍士丁男來會。再攻益州。時均方遣趙延順攻邛蜀。懷忠逆與之戰。賊退。與轉運使陳緯麾兵由子城南門直入軍資庫。奪其庫籥。均衆皆銀槍繡衣爲數隊。分列于城中。出通遠門與懷忠戰數合。會暮。懷忠復退軍笮橋。背水列陣。砦櫓木橋南。以扞邛蜀之路。賊故不復能南。自清水壩溫江金馬三道來攻。櫓木砦出官軍後。焚江原神祠。斷邛蜀援路。懷忠三路分兵以抗。斬首五百餘級。累其餘衆。

入阜江獲甲弩甚衆。乘勝遂至益州南十五里。若于雞鳴原。均亦閉成都東門以自固。懷忠又分所部。若於合水尾浣花等處樹機石。設筵離拒之。以俟王師之至云。王均初隸開封。散從直補軍校。與董福分領神御軍戍成都。福御衆有法。部下皆優足。均縱其飲博。軍資多乏。是歲車駕幸河朔。鈐轄符昭壽知州牛冕大閱二軍。衣服鮮敝不等。因是慙憤。值歲除。冕以酒肴犒士。均衆怨昭壽驕恣復肆侵虐。而冕亦寬弛無政。故諸朝合起爲亂。殺昭壽。成都官吏方賀正旦。以變皆奔竄。冕與轉運張適遁城而出。惟都巡檢使劉紹榮冒刃格關。衆寡不敵。叛卒欲奉爲主。紹榮攝弓罵曰。我燕人也。棄鄉土來歸本朝。豈能與汝同逆。我不負朝廷。汝亟殺我。衆未敢動。監軍王澤與均適至。澤語均曰。汝所部爲亂。盡自往撫之。均至卽擁以爲主。紹榮自經。

死均僭號大蜀改元化順署置官稱設貢舉以張錯爲謀主錯
本名美太原舊卒後爲神衛小校性狡猾嘗歷戰陣粗習陰陽
以熒惑同惡故勸均爲亂均實慙悞無謀嘗言官軍若至我先
路出迎自陳被勝之狀錯聞之以軍防守不令與人見官軍射
書入城錯悉焚之及招均子弟至城下均皆不知自起至敗所
守止於一城其初署親軍爲天降虎翼果爲虎翼軍所殺賊
旣平加有終保信軍節度觀察留後是役也懷忠之功居最爲
石晉所忌朝廷徵聞之遣寄班安守忠按視盡得其功狀遷懷
忠崇儀使領恩州刺史孫正辭內殿崇班張晌供備副使馬貴
供奉官有終代還知永興軍徙秦州幸瀘淵改并代副都部署
賜黃金內艱起復率所部由土門抵鎮州與大兵會威聲甚振
河北列城賴其雄張俄契丹修好命還屯所就判并州名拜宣

徽北院使檢校太保卒年五十九贈侍中錄其子孝若孝傑內
殿崇班閤門祇候孝緒供奉官孝恭侍禁有終側備自任不拘
小節有幹局沈敏善斷不畏強禦輕財好施歷典藩閫撫士卒
豐於宴犒官用不足傾私帑及權錢以給奉身甚薄所御銅鞍
勒馬而已至奏納父所創居第以償公貸優詔免之身沒之日
宿負猶千萬官爲代償樞府王繼英忌其進用頗言在蜀及守
邊厚費以收士卒心真宗不信卒保護焉從子孝先字子思

登進士試校書郎知天長坐訟除籍配均州復起知宛丘李繼
隆薦試大理評事真宗幸大名以部河北芻糧首至行在擢奉
禮郎隨討王均以升僊橋功改將作監丞用兵西邊請益募商
入粟償以茶鹽命馳驛陝西與轉運鄭文寶議立規畫後多施
行遷屯田員外郎建置三司拘收司以檢天下財利出入之數

詔如其請知興元府徙鄆貝邠用耀五州領昭州刺史益州涇
原路鈐轄西上閣門使至右領軍衛大將軍分司西京卒 孫
簡夫字太簡康定中杜衍薦召見以校書郎簽書泰州觀察判
官公事罷居長安自以本處士起不肯隨衆赴調時三白渠久
廢京兆遂薦簡夫先時治渠歲役六縣民四十日用梢木數百
萬而水不足簡夫用三十日梢木比舊三之一而水有餘除知
坊州徙簡州張方平薦知雅州旣而辰州蠻酋彭仕義內寇命
往督諸將進兵築明溪上下二砦據其險要拓取故省地石馬
崖五百餘里仕義內附擢三司鹽鐵判官知號同二州遷職方
員外郎卒子爵臣郊社齋郎 懷忠紹榮舊史不爲立傳牛冕
字君儀彭城人與張適皆登進士以均亂坐削籍冕流儋州起
爲淮南節度副使祠部員外郎卒適連州起爲彰信軍節度副

使知淮陽軍卒

石名幽州人徙太原祖全事周爲鐵騎軍使父通事太宗於晉
郎普十歲給事郎中以謹信見親補寄班祇候遷東頭供奉官
督兵往捕承興賊邢橐駝賈禿指數百人悉獲之遷內殿崇班
帶御器械討李順爲西川行營先鋒遷西京作坊使領欽州刺
史餘黨復寇邛鶴稱邛南王又以普爲西川都提舉捉賊使時
蜀民疑不自安多欲爲盜普因入奏而陳致亂由賦歛苛急農
民失業宜稍蠲減之使自爲生則不討而自平矣帝許之普急
還蜀揭榜諭上意蜀人悅服賊平賜白金襲衣金帶鞍馬遷洛
苑使領富州團練使王均亂與李惠李守倫並爲川峽路招安
巡檢使副雷有終進討均敗走死論功遷冀州團練使賜黃白
金兼帶御器械契丹犯邊爲保州兵馬鈐轄北面行營押策先

鋒與戰廉良城長城口獲俘器械甲甚衆徙定州路副都總管
靈州失守益兵備關中徙永興軍時軍制疎略晉將兵輒破一
錢與諸將各持其半凡號令進退及召將佐會合別屯皆倚以
爲信帝乃爲置傳信牌長六寸濶三寸腹背刻字而中分之每
臨陣令分持或傳令則書其言繫軍吏頸至彼爲合契晉又獻
禦戎圖請設堙以陷敵馬并上所置戰械甚衆徙爲莫州總管
自望都戰後諜言復欲大入帝自畫軍事詔以鎮定高陽兵會
定州夾唐河爲大陣立柵以守量寇遠近出軍始至勿輕鬪俟
敵疲氣衰則先鋒出致師騎兵居中環以步卒無遠離隊伍又
分兵出三路相爲犄角令晉統軍一萬屯莫州命列將各屯要
害以張軍勢繪圖分授諸將後數月復勅輔臣北邊已屯大兵
敵未有釁宜乘此時開浚靜戎順安軍界營田河道以扼黑崖

口三臺小李路亦可通漕彼或撓吾役卽合兵擊之李沆等曰
設險以制敵守邊之利也遂詔內侍閻文慶與靜戎順安知軍
事王能馬濟督其事而徙普屯順安之西寧御劔內侍馮仁俊
與普不叶上召仁俊還又令普率所部屯乾寧軍徙本州總管
瀧洲之役契丹欲請和因王繼忠遣人持信箭爲書遣普且通
密表事平遷容州觀察使向敏中爲鄜延路總管以普副之趙
德用納款普言不宜授以押蕃落使名目恐總制屬羌強橫將
不可制乃止兼管內蕃落使未幾徙鎮州路總管遷保平軍節
度觀察留後汾陰還至陝西普請駐蹕城中因賜詩令扈從至
西京拜河西軍節度使知河陽徙許州築大流堰引河通漕京
師上軍議條目二卷用將機宜要訣二圖上言聞角廝囉欲陰
報曹瑋請以臣所獻陣圖付瑋可使必勝時方崇尚符瑞普請

罷天下。燕設歲。可省緡錢七千餘萬。以贍國用。由是忤上意。王欽若乘機言。普以邊事恐動朝廷。帝怒。命知雜御史呂夷簡劾之。會又言。祥符九年九月下旬日食。集百官叅驗。是日不食。坐私藏天文下獄。應死。詔除名。貶賀州。帝語輔臣。普出微賤。性輕躁。干求不已。旣憐文藝。輒假手撰述。以揣摩時事。聞在紫微。思其幼子時。時泣下。可聽。挈家以行。甫至。授太子左清道率府副率。房州安置。稍復左千牛衛將軍。其妻表求小郡。遷左領軍衛大將軍。徙安州。仁宗遷左屯衛。徙蔡州。坐失保任。降本衛將軍。起知信陽軍。徙光州。以私用孔子廟錢。復貶左監門副率。滁州安置。尋以左衛將軍分司西京。給官第居蔡州。遷大將軍。卒。爲人性倜儻。有膽略。凡預計伐。聞敵所在。卽馳赴之。兩平蜀盜。大小數十戰。與賊角。勝衆推其勇。頗通兵書。陰陽六甲星曆推步。

之術太宗嘗謂其剛鷲與諸將少合然藉其善戰每厚遇之後值太宗忌日必盡室詣佛寺齋薦以爲常

許均開封人太常博士邈子建隆中應募爲龍捷卒征遼州以功補武騎十將賜錦袍銀帶開寶中遷武騎副兵馬使從曹彬征金陵率衆陷水砦流矢貫手改本軍使從征河東攻隆州城先登陷之中入剗遷副指揮使前後屢被賞賚出屯杭州妖僧紹倫結黨爲亂從巡檢使周瑩擒殺之端拱初補指揮使從李繼隆秦翰赴夏州擒趙保忠令均率兵衛守改龍衛第四指揮使徙屯夏州賊來犯境一日十二戰走之又從石普擊賊于原州牛欄砦深入獲牛羊漢口甚衆普表上其功遷第三軍指揮使咸平初以御前忠佐馬軍都軍頭戍秦州王均亂迺乘傳之蜀隸雷有終麾下守魚橋門又從秦翰追殺賊黨於廣都降其

衆七千授東西班都虞候領順州刺史五年召見訪以北而邊
事真拜磁州刺史深州兵馬鈐轄六年改涇州駐泊部署數月
知鎮戎軍以不諳吏治代以曹瑋徙邠州駐泊改永興軍部署
駕巡涇淵詔赴行在與鳳翔梁鼎同提總諸州巡檢捕盜事有
亡命卒王長壽多力善計聚徒剽劫均至肝城誘以方略擒之
盡獲惡黨敘勞擢磁州團練使尋出知代州景德四年被疾以
米銳代還未至卒錄其子懷忠爲奉禮郎懷信爲侍禁 幼子
懷德字師古長六尺餘善騎射擊刺以蔭爲東西班殿侍累擢
至殿前指揮使左班都虞候元昊寇邊選爲儀州刺史廊延路
兵馬鈐轄遷副總管夏人圍承平砦率勁兵千餘突圍破之有
賊將出陣前據鞍罵懷德引弓一發而踣敵去屠金明縣復
圍延州還遣裨將以步騎千餘夜出不意擊之斬首二百級圍

遂解遷鳳州團練使專領延州東路菱村一帶公事後累遷殿前副都指揮使寧遠軍節度使坐從妹亡無子欲冒其田事覺罷管軍知亳州徙徐州歲餘復爲殿前副都指揮使在宿衛十四年數乞身不許更保寧進雄二節度年八十猶生子筋力過人卒贈侍中諡榮毅

上官正字常清開封人少舉三傳後爲鄭州攝官雍熙中召授殿前承旨屢遣鞠獄遷供奉官開門祗候天雄監軍淳化中轉作坊副使爲劔門都監李順之亂賊黨分鈔劔門時止有疲兵數百人正激以忠義士氣振作會成都監軍宿翰領兵投劔門與正合迎擊賊衆數千斬馘殆盡奏至太宗嘉賞下詔獎飭並賜襲衣金帶超授六宅使劔州刺史充劔門部署翰自供奉官擢崇儀使領昭州刺史初賊勢甚盛朝議深以棧道爲憂正孤

軍力戰屢挫賊鋒自是閣道無阻王師得長驅入蜀順誅後餘
寇匿山谷恃險結集剽劫爲患正諭以朝廷恩信皆相率出降
加峰州團練西川招安使自負平賊有勞受人主知木鬬凌人
無所顧忌數暴揚官吏之短衆積怨多上章訴其不法帝欲保
全賜手札戒諭之正上表謝真宗改莊宅使復破劉肝功遷南
作坊使賜錦袍金帶咸平初擢東上閣門使勾當軍頭引見司
儀權戶部使二年出知滄州徙高陽關副都署真拜治州團練
使車駕北巡以爲行營先鋒鈐轄王均叛移峽路都鈐轄知梓
州歷滄瀛鎮三州高陽關部署以足疾求內知磁州手詔慰勉
會邢州地震民居不安徙治之又移潞州景德中以河北新經
兵革慎擇守臣復以正知貝州遷治與同州防禦使引年授左
龍武軍大將軍分司西京致仕卒年七十五正姪直遇事輒發

好攻人短失於謙和子璩至內殿崇班

弘簡錄卷一百十七

終

弘簡錄

卷一百十七

九

功臣宋四

弘簡錄卷一百十八

明刑部員外郎仁初弘齋仰經邦學

皇清翰林院侍講學士四世孫遠平校閱

功臣 宋三之五

王德用

父趙

尹繼倫

楊延昭

孫文廣

張進

周仁美

葛霸

子懷敏

劉平

弟兼濟

郭遵

弟進

盧政

任福

王珪

武英

桑懌

耿傳

王仲寶

景泰

子思忠

王信

郭恩

張岳

王德用字元輔趙州人父趙長七尺餘太宗尹京召置麾下卽

位以隸御龍直累遷河西軍節度使殿前都虞候真宗以翊戴

功加檢校太傅領天平軍節度咸平二年秋大閱禁兵超與張

進執五方旗以節進退軍容整肅上御戎幄觀之而賜褒獎從

幸大名爲先鋒都大點檢俄代傅潛爲侍衛馬步軍都虞候鎮
州行營都部署與契丹戰于遂城西俘馘二萬斬其裨王騎將
十五人手詔褒美李繼遷陷清遠軍以爲西面行營都部署將
步騎六萬授之徙帥永興繼遷圍麟州宰相復言其材改爲定
州路駐泊行營都部署王繼忠副之尋加鎮定高陽關三路排
陣使賜以御弓矢許便宜從事加開府儀同三司檢校太尉望
都之敗繼忠陷沒遣劉承珪李允則往察退衄之狀歸咎鎮州
部署李福拱聖指揮王昇各坐削籍流配嶺南景德初契丹攻
北平砦田敏等擊走之又攻保州不利乃合衆併攻定州趙拒
之於唐河駕巡澶淵詔率兵赴行在復緩師期會南北通好故
薄其責止罷三路帥爲崇信軍節度使徙知河陽移鎮建雄知
青州卒贈侍中尚書令追封魯國公諡武康其爲將善部分御

下有恩然臨軍寡謀拙於戰鬪德川幼從父補衛內都指揮使
年十七佐父討李繼遷爲先鋒將萬人戰鐵門關斬首十三級
俘掠畜產萬計進師烏白池超按兵不進德用請乘之得精兵
五千轉戰三日敵勢却德用曰歸師迫險必亂乃下令亂行者
斬一軍肅然繼遷蹙其後望見隊伍嚴整莫敢近超亦爲之按
轡撫其背曰王氏有子矣累遷內殿崇班御前忠佐馬軍都軍
頭出爲邢洺磁相巡檢盜張洪霸相聚界上吏不能捕德用密
以氍毹載勇士詐爲婦人飾過郊外賊果來邀勇士奮出悉禽
之徙督捕陝西東路盜賊聞其名相戒逃去尋以奏事忤旨責
授鄆州馬步軍都指揮使歷遷四廂都指揮領英州團練使天
聖初改博州知廣信軍城壞久不治率禁軍增築之詔褒諭徙
冀州又爲并代州馬步軍副都總管歷桂福觀察康州防禦使

侍衛親軍馬步軍都虞候章獻臨朝有求內降補軍吏者太后固欲與之德用不可太后崩有司請衛士坐甲以非故事不奉詔仁宗閱太后閣中得前奏軍吏事奇之謂可大用拜檢校太保簽書樞密院事辭曰臣武人賴陛下威靈幸得馳驅自效待罪行間足矣不足以當大事帝遣使趨入院遂爲副使景祐二年以奉國軍節度觀察留後同知院事三年遷知院事加檢校太尉累安德定國軍節度宣徽南院事請自將討元昊不許德用狀貌雄毅而黑頸以下白哲人咸異之言者謂貌類藝祖孔道輔又繼言之罷爲武寧軍節度使徐州大都督府長史嘗買商人馬言者誣其市於府州降右千牛衛上將軍知隨州置判官理其事家人皆惶恐德用舉止言色如平時惟不接賓客而已徙知曹州或告孔中丞害公今死矣德用曰中丞豈害我者

朝廷亡一忠臣可惜也起爲保靜軍節度觀察留後改青與澶
州拜保靜軍節度使會契丹兵壓境求關南地德用見帝流涕
言臣前被罪陛下赦而不誅今不足辱命帝勞之曰河北方警
藉卿鎮撫之適歲大熟契丹使劉六符過澶州拜曰此公仁政
所及尋徙真定兼三路都總管日訓練士卒久皆可用過大開
授桴鼓之士皆踴躍契丹覘者歸告謂漢兵將大入和議益決
連徙陳州河南入奉朝請拜同中書門下平章事累判相澶鄆
三州封祁國公兼會靈觀使侍射瑞聖閣連發皆中賜襲衣金
帶加檢校太師集慶軍節度使改封冀國公皇祐三年以太子
太師致仕乾元節上壽預班廷中契丹使諷譯者曰黑王相公
乃復用耶帝聞之起爲河陽三城節度使仍平章事判鄭州至
和元年進樞密使命入謁勿拜明年契丹使耶律防至又與射

王津園防曰。天子以公典樞密。而用富公爲相。將相皆得人。允
帝聞。賜弓一矢。五十後。封魯國公。求去位。至六七罷。爲忠武軍
節度使。景靈宮使。又除同羣牧制置使。詔五日一會朝。聽子孫
扶掖。卒年七十九。贈太尉。中書令。諡武恭。加賜其家黃金德川。
本將家子。習知軍中情僞。善以恩撫下。故多得士心。屢臨邊境。
未嘗親矢石。督攻戰。而名聞四裔。閭閻婦豎。皆呼黑王相公。帝
嘗問邊事。對以咸平景德中。賜諸將陣圖。人皆死守戰法。緩急
不相救。以致屢敗。願今勿賜。使得應變出奇。自立異効。帝以爲
然。諸子中咸融最鍾愛。晚年頗縱之多不法。後更折節自飭。官
至左藏庫使。眉州防禦使。

問曰。將相得人。豈爲容易。仁主方興。光武在位。全盛之時。
太平之治。

尹繼倫開封浚儀人父勳鄆州防禦使嘗內舉其子可用太祖以樞殿直權領虎捷指揮預平嶺表下金陵太宗卽位收供奉官從征太原還遷洛苑使充北面緣邊都巡檢使端拱中契丹將于越謀知李繼隆發鎮定兵萬餘護送芻糧數千乘趨威武城率精銳數萬邀之適繼倫領兵巡徼路與寇值越徑趨大軍不顧而去繼倫語其麾下曰寇蔑視我彼南出捷還則乘勝驅我而北不捷亦且洩怒於我將無遺類矣莫若卷甲御敵以躡之彼銳氣前趨不虞我至力戰而勝足以自樹縱死猶不失爲忠義豈可泯然爲異域鬼乎衆皆憤激從命迺令軍中秣馬俟夜人將短兵潛蹣其後行數十里至唐州徐河間天未明去大軍四五里會食訖將戰繼隆方陣于前以待繼倫從後急擊殺其相皮室衆驚潰于越方食失箸短兵中其臂創甚乘善馬先

遁寇兵隨之大潰相蹂踐死者無數餘黨悉引去契丹自是不
敢窺邊以繼倫面黑平居相戒必曰當避黑面大王錄功領長
州刺史仍兼巡檢淳化初著作郎孫崇諫自契丹逃歸太宗詢
以邊事言徐河之戰契丹奪氣每聞繼倫名倉皇不知所措於
是再遷尚食使加領長州團練以勵邊將五年歷河西兵馬都
監深州駐泊部署會五道分計李繼遷時大將李繼隆由靈環
路逗撓不進上怒急召繼倫授靈慶兵馬副都部署賜上尊遣
之時已被病強起受詔即日乘驛至慶州卒年五十計聞嗟悼
賻贈加等遣中使護喪歸葬

楊延昭初名延朗幼沉默寡言其父業常曰此兒類我每征行
必以從太宗時補供奉官從攻應朔爲先鋒戰于城下流矢貫
臂鬪益急業死錄爲崇儀副使知景州改江淮都巡檢兼知定

遠軍就加如京使咸平二年契丹母督戰延昭時在遂城城小無備契丹攻之急長圍數日衆心危懼延昭悉集丁壯登陴賦器甲護守會大寒汲水灌城旦悉成堅冰滑不可上遂潰去獲其鎧仗甚衆以功拜莫州刺史真宗駐大名名赴行在訪以邊要帝悅指示諸王曰其父忠節爲前朝名將今治兵護塞有父風深可嘉尚厚賜遣還是冬契丹南侵延昭伏銳兵於羊山西白北掩擊且戰且退及西山伏發敵衆大敗獲其將函首以獻進本州團練使與楊嗣並命帝謂宰相曰二人並山疎外以忠勇自效朝中忌之者衆朕力爲庇以及於此五年契丹侵保州延昭與嗣提兵援之未成列爲契丹所襲軍士多喪失命李繼宣王汀代還有司請治其罪帝曰嗣輩素以勇聞將收後效卽宥之望都之戰李繼宣坐以過削秩復以延昭爲都巡檢使條

上防秋利害又徙寧邊軍部署景德元年詔益延昭兵滿萬人如契丹入則屯靜安軍之東令莫州石普屯馬村西以護屯田倚角追襲延昭乃率兵抵遼境破古城俘馘甚衆及請和真宗御筆錄邊州守臣以示宰相命知保州兼緣邊都巡檢使追敘守禦之勞進本州防禦使俄徙高陽關副都部署祥符七年卒年五十七帝嗟悼遣中使護觀河朔之人皆望柩而泣錄三子官常從門客亦試藝甄敘之延昭智勇善戰所得休賜悉以犒軍未嘗問家事出入騎從如小校號令嚴明與士卒同甘苦遇敵必身先行陣克捷推功於下故人樂爲之用在邊防三十餘年敵人憚之目爲楊六郎契丹頓澶州曰延昭上言契丹去北地千里所掠咸在馬上人馬俱乏雖衆易敗願飭諸軍扼其要路則衆可盡殲卽幽易可襲而取時雖不能用論者壯之素不

達吏事晚年軍中謀訴常遣小校周正治之頗爲所罔帝知之
斥正還營而戒延昭焉 孫文廣字仲容初爲班行討賊張海
有功授殿直范仲淹宣撫陝西與語奇之置麾下從狄青南征
爲廣西鈐轄歷知德順軍宜邕二州累遷左藏庫使帶御器械
治平中英宗議宿衛將言文廣名將後且有功命爲龍神衛四
廂都指揮使連領成州團練興州防禦使充秦鳳副都總管韓
琦使築軍築城城爲夏人必爭之地文廣聲言城噴珠萃衆急
趨軍築比暮至其所部分已定遲明敵騎大至知不可犯而去
遣書曰將自國主以數萬精騎逐汝文廣復遣將追襲斬獲甚
衆由是奪氣詔書褒諭賜襲衣帶馬轉知涇州鎮戎軍定州路
副都總管遷步軍都虞候遼人爭代州地界又獻陣圖并取幽
燕策未報而卒贈同州觀察使

張進曲阜人拳勇善射挽強及石餘應募隸曹州鎮兵太祖親選勇士奇其才力以補控鶴官積勞至御龍弩直都虞候領恩州刺史至道中兼御前忠佐步軍都軍頭太宗嘗幸內殿進執鉞前導見其體質魁岸迥出儕輩熟視異之擢爲天武右廂都指揮使歷神龍捧日四廂領賀州團練使咸平初遷昭州防禦使京城左右廂巡檢使北征管勾大陣及先鋒策應三年權殿前都虞候遷侍衛步軍鎮州副都部署徙天雄軍會河決鄆州王陵口發數州丁男塞之命進董其役凡月餘畢詔褒之移并代副都部署李繼遷寇麟州守將間道乞師太原諸將以無詔旨猶豫未決進獨抗議發兵赴援既至而圍解手詔褒美契丹侵中山命率廣銳二萬騎由土門會兵鎮定未至而敵退復歸晉陽景德元年卒遣中使護喪還京官給葬事子元晉至內殿

崇班問門祇候元素爲三班借職

周仁美深州人開寶中應募隸貝州驍捷軍關南李漢超選備給使屢捕獲契丹諜者從漢超戰于西嘉山身中重創補隊長上功隸殿前班賜衣帶鞍馬什物奴婢器械王繼恩引入過祇候庫太祖問其力能負錢幾許對曰可勝七八萬上曰可惜壓死止命負四萬五千因以賜之稍遷右班都知御前忠佐馬軍副都軍頭皮環州時牛耶泥族累歲爲寇仁美與陳德玄宋思恭往擊之斬首三千級獲牛羊三百餘發戎族困窘以餉師又與思恭討募窟泉炭拖族格鬪斬八十餘級至道初牛泥族復叛仁美語石昌鎮主和文顯曰此賊不除邊患未弭因厚設殺酒召酋長二十八人縛送州獄自是諸族怕畏命爲先鋒部努糧之清遠軍至岐子平與敵遇擊走之明日大戰于蒲洛河自

已至戍數十合身中八創進壁乾河馬紹忠白守榮敗走田紹
斌退止蒲洛獨仁美所部不滿三千直護芻糧抵軍紹斌表上
其功先是諸蕃貢馬京師每爲繼遷邀擊仁美領騎士爲援賊
不敢犯補澶州龍衛軍都虞候選領軍中伉健者千人屢入敵
境有功還日召見自陳筋力未衰願隨諸軍殿廷從射上許之
旣而前奏曰臣老於戎門前後征行體被三十餘創未常入覲
今日得對至尊千載之幸儼獲備員宿衛立殿庭下一日足矣
傳潛亦稱其武幹留補馬步軍副都軍頭潛屯北面常以自隨
契丹攻蒲陰遣仁美領萬騎解其圍又從王超屯鎮定儀渭累
遷龍衛軍都指揮使領順州刺史時有亡命卒聚盜剽略爲患
超委以招捕仁美選勇敢卒詐爲亡命趨賊所得其要領卽自
往諭以禍福悉降之凡得二百餘人以隸軍籍景德中徙屯陳

州入掌軍頭引見司祥符元年從駕太山命檢視山下諸壇牲
牢祭饌明年出爲磁州團練使知衛州改滄州高陽關部署歷
龍神衛捧日天武四廂都指揮使獎州防禦使改端州權京內
新城都巡檢始立賞格巡兵捕盜不獲有罰獲者賞之詔從其
請天禧三年卒

葛霸真定人姿表果毅善擊刺騎射始事太宗藩邸踐阼補殿
前指揮使遷本班都知散員都虞候雍熙中爲驍騎都指揮使
領檀州刺史戍定州嘗遇敵唐河與戰敗走之斬獲甚衆俄召
爲御前忠佐馬步軍都軍頭端拱初出爲博州團練使歷潞代
二州部署淳化元年擢殿前都虞候爲高陽關都部署凡七戰
召還授保順軍節度出爲鎮州都部署徙天雄軍咸平三年車
駕勞師大名適康保裔戰沒卽以霸爲貝冀高陽關前軍行營

都部署未幾改邢寧涇原環慶三路遷侍衛馬軍都指揮領感
德軍節度使景德元年親征授西面邢洺路都部署又副李繼
隆爲駕前東面排陣使明年召還以功特加封邑上言朝廷居
明德心喪尚過音樂請停迎授之制詔可尋以年老罷軍職授
昭德軍節度使徙知耀州卒年七十五贈太尉子懷信如京副
使懷煦內殿承制懷正博州團練使知滄州懷敏以蔭授西頭
供奉官閤門祇候同提點益州路刑獄襄鄆都巡檢知隰莫保
三州累遷東染院使康州刺史知雄州就遷西上閤門使上平
燕策會歲旱塘水涸慮契丹使至測知深廣乃擁界河水注之
俄領萊州團練使濁流砦叛殺官吏遁去懷敏發兵掩襲盡誅
其黨在雄州五年徙滄州懷敏爲王德用妹壻德用貶亦降知
滁州陝西用兵起爲涇原馬步軍副總管兼涇原秦鳳經略安

撫別使入對。賜以曹瑋所被介冑。令制置鄜延環慶兩路。存廢砦柵。歷龍神衛。捧日天武四廂都指揮。眉州防禦使。知涇原鄜延路副都總管。進殿前都虞候。知延州。范仲淹言其得懦。不知兵。復徙涇原。慶曆二年。元昊寇鎮戎軍。懷敏出瓦亭砦。督都監許思純。劉賀。天聖砦主張貴及緣邊都巡檢向進。劉湛。趙瑜等禦敵。軍次安邊砦。給芻秣未絕。懷敏輒離軍。夜至開遠堡北一里而舍。旣又引騎百餘以前。承受趙正言敵近不可輕進。乃止。日暮趨養馬城。與知鎮戎軍曹英及涇原都監李和。王保王文鎮戎都監李岳西路都巡檢趙瑋等會兵開元。昊徙軍新壕外。懷敏議質明襲之。乃命諸將分四路趨定州砦。劉湛向進出西水口涇原路。都監趙瑜出進華堡。曹英李和出劉璠堡。懷敏出定西堡。知和與英督軍夜發。翌日湛進行次趙福堡。遇敵。

戰不勝。保向家峽。懷敏使珣英弁鎮戎西路。巡檢李良臣孟淵
援之。俄報敵已拔柵踰邊壕。懷敏入保定川砦。敵毀板橋斷其
歸路。別爲二十四道以過軍。環圍之。又絕定川水泉上流。以饑
渴其衆。劉賀率蕃兵闚于河西。不勝。餘衆潰去。懷敏爲中軍屯
塞門東偏。英等陣東北隅。敵自楊江三葉變會出。四面襲之。先
以銳兵衝中軍不動。回擊英軍。會黑風起。東北部伍相失。陣遂
擾。士卒攀城堞爭入。英面被流矢。仆壕中。懷敏兵見之。亦奔駭。
懷敏爲衆蹂躪幾死。輿致龔城。良久乃蘇。復選士據門橋。揮手
刃以拒入城者。趙珣等騎軍四合。敵稍卻。然大軍無鬪志。珣馳
入勸懷敏還軍中。是夕敵聚火圍城四隅。臨西北呼曰。爾得非
總管。應點陣圖者耶。乃入我圍中。復何往。夜四鼓。懷敏召諸將
計議。莫知所出。遂謀結陣走鎮戎軍。雞鳴。諭親軍左右及在後

者皆無得動。平明從吾往安西堡。以英珣爲先鋒。賀思純左右翼。知和爲殿。聽中軍鼓乃得行。至卯鼓未作。懷敏先上馬。周墜者再將徑去。有執轡者勸不可。不得已而還。使叅謀郭京等取芻城中未至。懷敏復上馬叱執轡者使去不聽。拔劍且擊之。士遂散。懷敏驅馬東南馳二百里。至長城壕路已斷。敵周圍之。遂與諸將皆遇害。餘軍九千四百馬六百匹爲敵所斷。于宗晟與趙正郭京承受王昭明還保定川。皆得存。時韓質郝從政胡息以兵六千保蓮華堡。劉湛向進兵一千保向家峽。皆不赴援。於是敵長驅抵渭州。深入六七百里。焚蕩廬舍屠掠民畜而去。奏至帝嗟悼久之。贈懷敏太尉。鎮戎軍節度使諡忠隱。同時戰沒諸將及涇原巡檢楊遵龍。竿巡檢姚興。涇原監押董謙同巡檢唐玘。指使霍達皆贈官有差。復降湛進等官落從政瑜。職懷敏。

通時事善候人情故多引才薦及用爲將而輕率昧於應變遂至覆軍子宗晟宗壽宗禮宗師皆遷官

劉平字士衡祥符人父漢凝從太宗征河東岢嵐憲州累遷崇儀使平性剛直幼任俠善弓馬讀書囑記及第補無錫尉擊賊有功擢大理評事知鄆陵縣徙南充檄權攝瀘州蠻人寇清井監平率土丁三千擊走之遷寺丞祠汾陰還路由安州遇賊十數發矢斃其三餘駭散寇準薦爲殿中丞知瀘州蠻人愆前敗不敢擾邊召拜監察御史久之除三司鹽鐵判官河北安撫真宗知其才改殿中侍御史出爲陝西轉運使與副使論事不合徙知襄州仁宗立遷侍御史以數論事爲丁謂所忌言於太后曰平將家子素知兵若使將西北可以制敵特改衣庫使知汾州熟戶名珠磨糜族數反覆平潛兵殺數千人以功領賓州刺

史鄴延兵馬鈴轄徙涇原路兼知渭州徙汝州真拜信州刺史
知雄州遷忻州團練使知成德軍景祐元年拜龍神四廂都指
揮永州防禦使知定州徙環慶副都總管又進侍衛親軍步軍
都虞候知澶州徙滄州改高陽關副都總管寶元元年爲環慶
路馬步軍副總管會元昊反遷邕州觀察使鄴延路副總管兼
環慶同安撫使兼管勾涇原路兵馬進步軍副都指揮使領靜
江軍節度觀察留後獻攻守之策略曰五代之末中國多事惟
制西戎爲得之中國未嘗遣一騎一卒遠屯塞上但任土豪爲
衆所伏者封以州邑征賦所入足以贍兵養士由是無邊鄙之
虞太祖定天下懲唐宋藩鎮之盛削其兵柄收其賦入自節度
以下第坐給奉祿或方面有警則總師出討事已則兵歸宿衛
將還本鎮彼邊方世襲宜異於此而誤以朔方李彝興靈武馮

繼業一切亦徙內地。自此靈夏仰中國戍守。千里運糧。兵民並困。其後靈武失守。趙德明懼王師問罪。願爲藩臣。於時若止棄靈夏。綏銀與之。限山爲界。則無今日之患矣。而以靈夏兩州及山界蕃漢戶并授德明。故蓄甲治兵。漸窺邊隙。西邊所以不能弛備也。今元昊嗣國。政刑慘酷。衆叛親離。復與唃廝囉構怨。此乃天亡之時。若乘此用鄜延環慶涇原秦隴四路之兵。分兩道益以蕃漢弓箭手。精兵可得二十萬。三倍元昊之衆。轉糧二百里。不出一月。可收山界洪宥等州。招集土豪。縻之以職。自防禦使以下。刺史以上。又以土人補將校。使勇者貪於祿。富者安於家。不替月而人心自定。及遣使諭唃廝囉。授以靈武節度。使撓河外族帳。以窘元昊。復出麟府石州蕃漢步騎。獵取河西部族。招其酋帥。離其部衆。然後以大軍繼之。元昊將鼠竄不暇。何能

爲哉。朝廷若貸元昊罪。更示含容。不惟宿兵轉多。經費尤甚。萬
一元昊潛結契丹。互爲犄角。則我一身二疾。不可並治。如何減
兵以應河北。請召邊臣與二府定守禦長策。疏奏未報。會元昊
攻保安軍。時平屯慶州。范雍召與石元孫合軍趨土門。旣又聞
元昊破金明園。延州雍復召合兵救之。平素輕敵。督騎兵晝夜
倍道行。至萬安鎮。平先發。步軍繼進。夜至三州口。四十里止營。
遣騎兵先趨延州爭門。雍又召鄜延路駐泊都監黃德和碎金
谷巡檢萬俟政郭遵各將所部爲外援。詰旦。平與元孫德和政
遵所將兵悉至。凡步騎萬餘。結陣東行五里。與敵遇。會大雪。兩
軍皆爲偃月陣相嚮。有頃。敵兵涉水爲橫陣。郭遵及忠佐王信
薄之。不能入。官軍並進。殺數百人。乃退。敵復蔽盾爲陣。官軍復
擊卻之。奪盾殺獲及溺水死者幾千人。平左耳右頸中流矢。日

募戰士上首功及所獲馬。平曰：戰方急，爾各誌之。當重賞。語未已，敵以輕兵薄戰。官軍引卻二十步。德和居陣後，望見軍卻，率麾下走保西南山。衆從之皆潰。平遣其子宜孫馳追德和，勒兵還併力抗敵。德和不從，驅馬遁赴甘泉。平遣軍校伏劍遮留。士卒得千餘人，轉鬪三日。賊退還水東。平率餘衆保西南山，立七柵自固。敵夜使人叩柵，問大將安在。士不應。復使人爲戍卒，遁文移。平平殺之。夜四鼓，敵環營呼曰：如許殘兵，不降何待！旦日，敵會衆，鞭麾騎自山四出合擊。絕官軍爲二。平遂與元孫皆被執。德和紿言平降，賊朝廷發禁兵圍其家。及命文彥博卽河中府置獄，遣隴籍往訊得實，遂釋其家。延州吏民亦詣闕訴平。戰沒狀，遂贈朔方節度使兼侍中，謚壯武。賜信陵坊第，封其妻趙氏南陽郡太夫人。子孫及諸弟皆優遷。未官者，錄之後降羌。

多言尚在興州生一子元孫歸乃知沒于興州弟兼濟字實臣以蔭補三班奉職善騎射讀兵書知大旨爲襄州兵馬監押漢江暴漲解衣涉水率衆捍城州賴以完擢閤門祗候雄霸州界河巡檢徙晉絳澤潞都巡檢使歲饑太行多盜禽二百餘人以左侍禁鄜延路兵馬都監權知保安軍歷同提點陝西河東刑獄徙知龍竿城夏人寇邊衆號數萬兼濟將兵千餘轉戰黑松林敗之會平賊沒特授內殿崇班知原州入辭仁宗慰勉曰國憂未弭家仇未報不可不力屬戶名珠族叛兼濟繆爲不知以疑其意旣而叛者自潰追襲之殺其酋長收餘衆以歸又破斬斫轆砦元吳稍藩徙夔梓路鈐轄復知鎮戎廣信二軍卻下嚴急士心多怨轉運使以爲言乃改涇原路鈐轄歷寧鄯原冀雄忻凡六州累遷文思使惠州刺史河北緣邊安撫副使西上

閤門使同管勾三班院卒

郭遵開封人家世以武功隸軍籍稍遷殿前指揮使乾興中改左班殿直并代路巡檢歷左右侍禁慶州柔遠砦軍馬監押召試騎射優等遷閤門祇候爲秦州高陽砦主徙延州西路都巡檢使未幾而元昊寇延州遵以裨將屬劉平遇敵馳馬入陣叔傷數十人敵出驍將楊言當遵遵揮鐵杵破其腦兩軍皆大呼復持鐵槍進所向披靡會黃德和潰敗益急遵自期必死獨出入行間軍稍卻復騎以殿持大稍橫突昊知不可敵使人持大索立高處迎遵馬輒爲遵所斷因縱使深入攢兵注射中馬馬蹄仆地被殺贈果州團練使封母賀氏仁壽郡君妻尹氏安康郡君弟青右侍禁四子尚幼仁宗悉爲賜名忠嗣西頭供奉官忠紹忠裔左右侍禁忠緒左班殿直後耕者于戰處得遵所

用鐵杵槍稍共九十斤併與其衣冠葬之河南弟達字神通

以兄死事錄爲三班奉職隸陝西范仲淹麾下勉以問學延安

清剛社募兵誤殺熟羌將達請宥之活壯士十二人方議取靈

武達謂地遠而食不繼城大而兵不多未見其利未幾任福果

敗陳執中安撫京東奏爲駐泊將諭當今名將其推葛懷敏達

言懷敏喜功微幸徒勇無謀他日必敗朝廷事役果覆師人咸

服其先見以爲真知兵尋遷真定兵馬監押保州卒待其臻叛

川况遣往招之以嘗與同事仲淹乃馳至城下示以舊所佩紫

並臻識之卽與其黨韋貴史克順迎達申諭禍福開城出降論

功加閤門祗候環慶兵馬都監母憂解任喪除爲涇原都監轉

通事舍人徙河北緣邊安撫副吳奎使契丹還坐不應劄爲汾

州都監河東隴籍押權忻州契丹來求天池廟地達訪得故牘

證爲王土檄報之契丹愧服彭仕義叛加帶御器械爲路鈐轄
兼知澧州得蠻親信爲鄉導盡平諸隘遂被其所居桃花州仕
義棄城走衆悉降遷禮賓使徙南路鈐轄知邠州武岡蠻反復
討平之遷容州觀察使掌仁宗山陵宿衛遷殿前都虞候出爲
涇原路副都部署治平二年以檢校太保同簽書樞密院領陝
西宣撫使判渭州討平蕃部党令征等神宗遷靜難軍留後召
還改宣徽南院使判邠州徙鎮鄜延楊定被殺劾議焚棄綏州
達言夏人旣殺王官而又棄綏不守見弱已甚旣而許以塞門
安遠二砦來易達度此商於六百里之策非先交二砦不可遣
其屬趙鹵薛昌朝與議果如所料又言以亡命景詢易名山夫
詢庸人於事何所輕重恐還名山自是蕃酋無復向化者矣敵
又景死囚給戎爲殺楊定者報以必執李崇貴韓道喜來夏人

執獻之加檢校太尉雄武軍留後俄而韓絳主和謗計圖橫山
遂不肯出兵奏爲沮撓名還明年慶州亂山判永興徙秦州王
韶開熙河按其不法遣蔡確鞠之坐逮誣罔落宣徽知潞州徙
太原交趾李乾德陷邕管名爲安南行營經略招討兼荆湖廣
南宣撫使總九將軍兵共三十萬遣鈐幣和玘等督水軍渡海
自廣東入諸軍自廣南入遂收交趾於富良江獲僞太子洪真
乾德亦表請降然冒暑涉瘴地死者過半移疾坐貶左衛將軍
屏處十年哲宗立復起知潞州進廣州觀察使知河中辭歸洛
從舉崇福宮卒贈雄武軍節度使爲人慷慨喜兵法神宗嘗訪
八陣遺法對曰兵無常形是特奇正相生之一法爾因爲帝論
其詳使教延安兵久不就遂擇諸校習金鼓屯營者六十四人
人教一陣不久而成善用偏裨每至所部令人自言所能暇日

閔按之故臨陣皆盡其技遇戰陣先招懷後戰鬪愛惜士卒不妄誅戮其殺賊婦女老弱者皆不賞李復圭治慶州敗將斬李信劉甫又欲罪鄜延都巡檢白玉因見述託以後事且泣言不得終養述哀之申救甚力得免已而王大捷于新砦神宗獎述白玉能以功補過卿之力也雖坐征南久廢猶隱然爲一時宿將云

盧政太原文水人爲神衛都軍頭從劉平與夏人戰延州寇薄城南閫兵不得成列政引數騎挑戰賊發伏弩二百射却之日暮政說平曰今處山間又逼汙澤宜速退保後山須明決鬪不然彼夜出乘高蹙我何以禦之平不聽遂敗政脫身歸及黃德和誣平降賊仁宗問狀政自陳失主將當死平質被執非降也帝義其言赦之以爲供奉官德州兵馬監押預討貝州率勇

敢數百人飛環絙堞而登守者莫能亢大軍乘之以入遷內殿承制南征儼智高有功歷泰鳳高陽關都鈐轄治平熙寧中爲捧日天武四廂都指揮使三衛都虞候涇原定并代四路副都總管累轉祁州團練昌州防禦黔州觀察使拜武泰軍節度使時年七十三氣貌不衰侍立殿下雖久無惰容能上馬踴躍觀者壯之卒贈開府儀同三司

任福字祐之河東人徙開封咸平中補衛士由殿前諸班累擢通郡刺史元昊反除莫州刺史嵐石關州緣邊都巡檢使移知隴州擢泰鳳路馬步軍副總管受詔增陝西城壘器械四十日畢備領忻州團練使鄜延副總管管勾延州東路蕃部事尋知慶州兼環慶副總管聽便宜從事夏人寇保安鎮戎軍福與子懷亮姪塔成爲聲言巡邊名諸將牽制敵勢行至柔遠砦夜部

分諸將攻白豹城。漏未盡。抵城下。四面合擊。平明破之。縱兵大掠焚巢穴。獲牛馬橐駝七千有餘。委聚方四十里。平骨咩等四十一族以功拜龍神衛四廂都指揮使。賀州防禦使待衛馬軍都虞候康定二年。初議發涇原鄜延兩路兵西討。詔福詣涇原會安撫韓琦計事。聞元昊謀寇涇州。琦募敢勇得萬八千人。使福將之以取傅叅軍事。桑懌爲先鋒。朱觀武英王珪各以所部從。福節制琦戒福等併兵自懷遠城趨得勝砦。至羊牧隆城山敵後。諸砦相距纔四十里。道近糧便。度勢未可戰。則據險設伏待其歸。邀擊之。福引輕騎數千趨懷遠城。捺龍川遇鎮戎西路巡檢常鼎劉肅與敵戰于張家堡南。斬首數百。夏人棄馬羊橐駝。佯北。懌引騎趨之。福踵其後。諜傳敵兵少。福等頗易之。薄暮與懌合軍屯好水川。觀英屯籠落川。隔山五里。約翌日會兵川。

口路既遠。芻餉不繼。士馬乏食已三日。追奔至籠竿城北。遇夏軍循川行。出六盤山下。距羊牧隆城五里結陣。諸將方知墮敵計。勢不可留。遂前格鬪。悍馳犯其鋒。福陣未成列。賊縱鐵騎突之。自辰至午。陣動。衆傳山欲據勝地。俄伏發。自山背下擊士卒。多墜崖塹。相覆壓。小校劉進勸福自免。福曰。吾爲大將。兵敗以死報國。爾復力戰。身被十餘矢。揮四刃鉞。簡挺身決鬪。營中左頰絕。其喉而死。懌肅津先戰死。英珪傅鼎皆死。內殿崇班柴贊供奉官王慶侍禁李簡李禹亨劉鈞渭州駐泊都監趙津亦戰死。及軍校數十士六千餘。悉無存者。惟朱觀以兵千餘保民垣。得全。方元昊傾國入寇。福臨敵受命。所統皆非素撫之兵。旣又分出趨利。故至於敗。奏至帝震悼。特贈武勝軍節度使兼侍中。賜第一區月給其家錢三萬粟麥四十斛。追封母隴西郡太夫人。

人妻琅邪郡夫人子懷亮亦死錄少子及從子凡六人

王珪開封人少拳勇善騎射能用鐵杵鐵鞭年十九隸親從官累殿前第一班押班擢禮賓副使涇州駐泊都監康定初元昊寇鎮戎軍珪將援兵三千爲先鋒自瓦亭至師子堡敵圍之數重珪奮擊披靡多獲首級至鎮戎叩城請益兵不獲惟縋糗糧予之師旣飽因語其下曰兵法以寡擊衆必在暮我兵少乘其暮擊之可以得志復馳入奮擊遇敵驍將持白幟挺槍直珪胷。嘗曰誰敢與吾敵者槍傷珪右臂珪左手以杵碎其腦繼又一將以槍逼珪珪挾其槍奮鞭擊殺之一軍大驚遂引去珪亦以馬中箭而還仁宗特遣使撫諭之以所奪二槍植山上然以其下死傷亦多止賜名馬二匹黃金三十兩褰創絹百匹下詔暴其功以厲諸將是歲改涇原路都監明年命監本路行營兵勦

璋將作監簿珪試校書郎琬同學究出身

王仲寶字器之高密人初爲刑部吏補章丘尉以捕盜功判官
鞠仲謀薦召對改右班殿直爲鎮定保深永寧天雄六州軍巡
檢又擒磁州賊權閭門祗候捕獲登州海賊還提舉河北捉賊
知信安軍悉招西山盜百餘出隸軍籍奏以自隨徙澤潞晉絳
磁熙威勝軍巡檢使至官入日獲太行宿賊八十人累賜金帛
緡錢使契丹還遷內殿承制天聖初改供備庫副使知鎮戎軍
破康奴族獲首領百五十羊馬七千詔獎其功還巡諷惠民河
堤岸遷麟府路兵馬鈐轄兼知麟州會蕃族內寇徙涇原路鈐
轄復知鎮戎以西京左藏庫使領惠州刺史歷知原環利三州
徙并代鈐轄改西上閤門使建言緣邊博糴屬羌苦之數逃去
請寬其法使得復業以捍邊境元昊寇延州仲寶將兵至賀蘭

谷以分敵勢敗蔣將羅逋于長雞嶺累四方館使濮州團練涇
原路總管兼安撫副使管勾秦鳳路軍馬與夏兵戰六盤山俘
馘數百人值任福敗好水川別將朱觀被圍于姚家堡仲寶以
兵拔之出圍乘以從馬時諸將皆沒獨仲寶與觀以兵千餘保
民垣四向縱射會暮敵引去乃得還徙環慶路副都總管知慶
州未幾兼本路經略安撫招討副使破金湯城詔獎諭徙涇州
副總管范仲淹奏留以磁州防禦使知代州除左屯衛大將軍
致仕卒

景泰字周卿普州安岳人登進士起家軍事推官累屯田員外
郎通判慶州元昊反上邊臣要略二十卷改都官郎中知成州
奏平戎策十五篇有薦其知兵者召對稱旨換左藏庫使知寧
州任福敗徙原州元昊衆十萬分二道攻渭州一出劉瑋堡一

出彭陽城葛懷敏敗沒敵騎逾平涼至潘原秦率兵五千從間道赴潘原先鋒張廻迴不進秦斬以徇遇敵彭陽西裨將夏侯觀欲退守彭陽秦弗許依山而陣未成列敵騎來犯秦陰遣三百騎分左右翼張旗幟爲疑兵敵佯遁去將校請進擊秦止之遣騎搜山果得伏兵與戰斬首千餘級以功遷西上閣門使知鎮戎軍兼兵馬鈴轄久之領忠州刺史徙秦鳳路馬步軍總管卒子思忠字進之以蔭補官累遷西京左藏庫使爲遂州駐泊都監夸人寇清井鈴轄張承祐出兵禦之思忠部卒五百爲前鋒夸乘險薄官軍戰不利死者十之六左右勸引避思忠不聽奮劒疾戰而死走馬張宗望爲言詔察訪使熊本核實神宗憫之官思忠及同死者之子七人餘皆賜復其家弟思立亦以蔭主渭州治平砦羅元用兵韓絳使攝保安軍王韶入朝

以知河州事青宜結鬼章遣以書詞不遜思立怒帥兵六千攻之。于踏白城。鈴轄韓存寶蓄將贍藥交止之。不聽。自將中軍使存寶及魏奇爲先鋒。王存將左賈瑛將右鬼章率衆二萬分三砦以抗官軍。戰數十合。從山下圍中軍。別將王寧李元凱沒于陣。思立存寶潰圍出。諸將多傷。會日暮。兵疲欲移屯東岡。以自固。時魏奇剗重思立獨從其軍。奇方遣行殿後兵。亂前人望見皆潰。思立且闕且退。曰。我適以百騎走羌數千人。今敗矣。無助我者。當自剄以謝朝廷。衆止之。少頃再戰。遂死。兄弟繼沒。王事人皆憐之。

王信字公亮太原人家。故饒財。少勇悍。祥符中。部使者薦召閭武藝。遷御前忠佐軍。領河中府同幹。鄜延丹坊州慶成軍管界。捉賊又遷龍衛都虞候。兼鄜延巡檢。劉平石元孫戰歿。信以所

部兵薄賊斬首數千級遷捧日都虞候改西京作坊使知鎮戎軍徙保安軍兼鄜延路兵馬都監始至敵衆數萬夜薄城軍吏氣懾信領勁兵三千出南門與戰失其前鋒因按軍不動遲明整軍潛上東山乘勢而下擊走之多獲首級馬牛遷鈐轄兼經略安撫使招討都監領貴州刺史葛懷敏敗信出兵拒敵俘斬甚衆進保州刺史就遷馬步軍都虞候象州防禦使徙高陽關路王則反明鎬奏爲都總管城破執則而還餘黨自焚死拜威德軍節度觀察留後名爲中軍副都指揮使未至卒贈武密軍節度兼侍中

郭恩開封人初隸諸班出爲左侍禁閤門祇候歷延州西路都巡檢環州肅遠砦主累遷內殿承制泰鳳路兵馬都監開古渭州路恩爲前鋒斬首九百餘級擢崇儀副使會掌烏族叛率兵

攻討斬首八十五級。遷六宅副使進崇儀使爲秦隴路兵馬鈐
轄。徙并代州鈐轄管勾麟府軍馬夏人歲侵屈野河西地至耕
獲時輒屯兵以誘官軍自正月至三月然後去時司馬光通判
并州與知麟州武賈通判夏倚議曰乘敵去可增築二堡以據
其地廢橫戎臨砦二堡徹樓櫓徙甲兵以實新堡列烽燧以通
警急有急則州及橫陽堡出兵救之敵盛則入堡以避如是則
堡外必不敢耕種州西五六十里之內可晏然無事經略使龐
籍如其議嘉祐二年遣恩與武賈走馬承受公事內侍黃道元
以巡邊爲名往按視之夜率步騎六千四百餘循屈野河北而
行夏人舉火臥牛峯戢指示恩曰敵知吾軍至矣道元怒曰此
爾曹故沮我師耳強之行恩欲休兵須曉乃登山道元又詬之
恩亦慍曰不過死爾乃行比明至忽里堆見敵數十人皆西走

相去數十步止不動俄而火起賊隊左右翼南北交至堆東有堊其中有浮梁恩等東據梁口力戰自旦至食時敵自兩旁堊中攀緣而上四面合擊衆大潰恩道元及都監劉慶皆被執使臣死者五人軍士馘耳鼻得還者百餘人亡失器甲無算恩不肯降遂自殺事聞贈同州觀察使封妻京兆郡君錄子弟有差給舊俸三年歲坐棄軍除名編管江州

張岳字子雲府州府谷人以貲爲牙將有膽略善騎射天聖中西夏觀察使阿遇背約安撫使遣岳詰問岳徑造帳中諭以逆順阿遇語屈留共食抽佩刀貫大轡以啗岳岳引吻就食無所憚阿遇復指其腹張鏃而殺岳食不輟神色自若阿遇撫其背曰真男子也翌日與岳獵兔起馬前岳發矢連斃雙兔阿遇驚服遣岳馬橐駝悉歸所鹵州將補爲來遠砦主手殺僞首領奪

其甲馬時年十八名勦一軍爲都教練使元昊犯鄜延從折繼
閔進兵破浪黃党兒兩族射殺數十人斬僞軍主教保以功補
下班殿侍三班差使時敵騎方熾中人促賜軍衣至麟州不得
前管勾軍馬康德輿遣岳馳騎五十往護之至眉浪遇賊接戰
流矢貫雙頰拔去鬪愈力奪馬十二匹而還賊攻府州急將登
城衆囂曰城破矣岳乘陴大呼搏賊賊退城復完飛矢中岳右
目身被三創猶晝夜督守又帥死士開關護州人汲于河訖圍
解城中水不乏以勞還右班殿直麟府州道路巡檢護往來饋
運遇賊數千於深柏堰分兵追擊斬首百餘奪兵械馬牛數百
近郊民田比秋成未敢獲岳以計于張亢得步卒九百護之大
敗賊於龍門川從諸將通麟州糧道破賊於柏子砦改左班殿
直復護內侍宋承誠傳詔砦下遇賊立松嶺以精騎挑戰矢中

臂猶躍馬左右馳射諸將乘勝而進賊遂潰特收西頭供奉官
遷內殿崇班賊破豐州與諸將一日數戰破容州刺史耶布移
守貴叅砦俘獲萬計遷禮賓副使明鎬在河東以岢嵐軍當雲
朔路奏爲麟府路駐泊都監兼沿邊都巡檢使駐岢嵐俄坐擅
易砦地左遷絳州都監會二州未解嚴復以岢爲麟府都監屯
安豐遷洛苑使嘗從數騎夜入羌中調機事旣還羌覺追之岳
輒効羌語隨羌疾馳數里乃得脫以數中流矢創發臂間卒